

तौने कूप माहि घट लैकै । पूरणार्यकी तिय सुख म्वैकै ॥

दोहा—गई भरनजल तेहि समय, रामानुजकी नारि ॥

गई तौनही कूपमें, भरनहेतुवरवारि ॥ ३० ॥

रामानुज तिय पूरणनारी । एक संग गगरी दोउ डारी ॥
 पूरण तिय जब जलभरि लयऊ । रामानुज तिय घट पर परेऊ ॥
 रामानुज तिय अतिहिं रिसाई । गुरुनारीकी कानि विहाई ॥
 बोली वचन कुंभजल तोरा । कियो अशुचि परिकै घट मोरा
 रे कुलनीच न जानसि वाता । हमरो कुल जगमें विख्याता ॥
 तेरो परसित जल नहिं पीहैं । यह घट कूपडारि हम देहैं ॥
 तब कोपित कह पूरणनारी । मैंतेरी जानहु वडवारी ॥
 यहि विधि दुहुँसो भयो विवादा । छूटी गुरु शिष्यमर्यादा ॥
 पूरण तिय तब निज घर आई । निजपतिसों सब कथा सुनाई ॥
 पूरण मानि मनहिं अपमाना । तुरत रंगपुर कियो पयाना ॥
 उत रामानुज सेवन हेतू । सांझसमयगे गुरुनिकेतू ॥
 गुरुको तहँ न देखिदुखपागे । सबै परोसिन पूँछन लागे ॥

दोहा—तहँके जन भाषत भये, तुवतिय पूरणनारि ॥

दोउ कूपजल भरतमहँ, करत भई अतिरारि ॥ ३१ ॥

कारण हम कछु तासु न जाना । रंगनगर गुरु कियो पयाना ॥
 रामानुज तुरंत घर आई । पूँछन लागे नारि बोलाई ॥
 तब बोली रामानुज दारा । तेहिं परसितजल अशुचि अपारा ॥
 तातेकुंभ कूपमहँ डारी । मैं आई ताको दैगारी ॥
 सुनिरामानुज किय अतिकोपा । कीन्हो अरी धर्मकर लोपा ॥
 जासु उच्छिष्ट सदा हम खाहीं । तेहितिय परसित जलशुचिनाहीं
 यहको सुनै को करै उचारा । तैं किय गुरु अपकार अपारा ॥
 अब नहिं मैं रखिहौं गृह तोको । क्षणभरि नीक लगत नहिं मोको ॥

तब डेराइ रामानुज नारी । ह्वै नम्रित बहु विनय उचारी ॥
वरदराजके मंदिरमाहीं । रामानुजगे पूजन काहीं ॥
मनमें लागे करन विचारा । तजौ कौनविधि में निजदारा ॥
ताही समय विप्रइक आयो । लागि क्षुधा अस वचन सुनायो ॥

दोहा—तब रामानुज यह कह्यो, ले सहिजानी मोरि ॥

जाहु भवन ममनारि है, क्षुधानिवारीतोरि ॥ ३२ ॥
भवन गयो लै द्विज सहिजानी । भोजन देहु कह्यो अस वानी ॥
तब रामानुज तिय अनखाई । राख्यो का तुव हेतु धराई ॥
जाहु जाहु घरते भिखियारी । नहिं रुचि पैसहु देन हमारी ॥
बहुरिविप्र रामानुज नेरे । आइ कह्यो जस गुणतियकेरे ॥
तब रामानुज मनहिंविचारा । लागि गयो अब यतन हमारा ॥
सह्यो तीनि अपराध तियाके । तियमहँ अवगुण सब वसुधाके ॥
अस विचारि पुनि विप्र बोलायो । ताहिभांति यह वचन सुनायो ॥
तेरे मैकेते हम आये । तुव ढिग जननी जनक पठाये ॥
है तेरे भ्राताकर व्याहा । तैं आवै इत होइ उछाहा ॥
निजकर पुनि पत्रिका बनाई । कुंकुम मलयज बिंदु सिंचाई ॥
लिख्यो ताहि महँ यहीहवाला । ममसुत होत व्याह यहिकाला ॥
तोरे आये पूरण होई । विन आये हँसिहैं सब कोई ॥

दोहा—अस पाती लिखि विप्रकर, रामानुज दै दीन ॥

विप्रचल्यो पछितात घर, कौन काज हम कीन ॥ ३३ ॥
जब द्विजजाइ पत्रिका दीनी । रामानुज तिय सादर लीनी ॥
पितु पठयो गुणि करि सतकारा । दिय अहार तेहि विविध प्रकारा ॥
रामानुज जब घर पुनि आये । तब तिय कह्यो मोदमन छाये ॥
ममभ्राता कर होत विवाहू । कहौ तौ देखन जाउँ उछाहू ॥
जननी जनक मोहिं बोलवायो । यह द्विज कंत बोलावन आयो ॥

तब रामानुज आनँद मान्यो । जाहु अवशि अस वचन बखान्यो
 लै पट भूषण औरहु साजू । दिहेहु अनुजकहँ मध्यसमाजू ॥
 हम दिन पांच गये उत्त ऐहँ । तुमको पुनि लेवाइ इत लैहँ ॥
 नारि विविध पट भूषण लैकै । चली पीरकहँ प्रमुदित हैकै ॥
 तब रामानुज लहि सुखरासी । जान्यों छूटि गयो गलफाँसी ॥
 पुनि विचार किय परमउदंडा । अब धारण करि लेहिं त्रिदंडा ॥
 अब न गृहस्थाश्रम हम रहिहँ । औरहु कछू वस्तु नहिं चाहिहँ ॥

दोहा—पठै मायकै निज सती, त्यागि जगतकी आस ॥

नारायणपद प्रेमकरि, दियो विहाइ अवास ॥ ३४ ॥

यहिविधि तहां त्यागि निजनारी । घर कुटुंबकी सुरति विसारी ॥
 वसन कषाय सुपात्र अखंडा । तथा कमंडलु और त्रिदंडा ॥
 ग्रहण करव त्रिदंडकी साजू । लै अपने सँग मोद दराजू ॥
 वरदराज मंदिरमहँ जाई । आगे धरचो साज समुदाई ॥
 पुनि करजोड़ खड़ेभये आगे । रामानुज अच्युत अनुरागे ॥
 विनय कियो है त्रिभुवन राज । जो तुम्हारि अनुशासन पाऊं ॥
 ग्रहणकरुं त्रिदंड यहिकाला । जो निरवाहहु दीनदयाला ॥
 सुनि रामानुज गिरा सुहाई । प्रभु प्रत्यक्ष बोले मुसकाई ॥
 जाहु अनंत सरोवर काहीं । तहाँ वसै ममभक्त सदाहीं ॥
 तिनसों भूरि मित्रता कीजै । सविधि त्रिदंड ग्रहण करिलीजै ॥
 रामानुज सुनि वचन नाथके । गुन्यो भये जन रमानाथके ॥
 सो आनँद उरमहँ नसमाई । गयो अनंत सरोवर धाई ॥

दोहा—तहँ हरिदासन बोलि बहु, करि शिरभरि परणाम ॥

चरण यामुनाचार्यके, वंदन करि तेहि याम ॥ ३५ ॥

सादर सविधि सुसंत हुलासी । गह्यो त्रिदंड भयो संन्यासी ॥
 तबते यतिवर नाम कहायो । देव गगन दुंदुभी बजायो ॥

भई गगनते फूलनि वर्षा । जय जय कियो सुसंत सहर्षा ॥
 महिमंडल महँ मंगल छायो । लुक्यो जाय कलि विपिनडरायो ॥
 इत कांची पूरण कहँराती । सपनदियो मधुकैटभ चाती ॥
 मम पादुका और पद नीरा । छत्र विशाल जटित बहु हीरा ॥
 चामर चारु चारि छबिछाई । रत्न जटित पालकी सोहाई ॥
 तोहिँ पालकीमाहँ छबिछावन । धरि मेरे पादुका सुहावन ॥
 रामानुजके निकट सिधाई । ल्यावहु तिनको इहाँ लेवाई ॥
 कांचीपूरण गुणिप्रभु शासन । उठे प्रभात त्यागिनिजआसन ॥
 प्रभु पादुका पालकी धरिकै । चामर छत्र सहित सुख भरिकै ॥
 लेन सुरामानुज अगुवाई । कांचीपूरण चले तुराई ॥

दोहा—रामानुजके निकट चलि, धारि खराऊंशीश ॥

कांचीपुर ल्याये सुखित, सुमिरि वरद जगदीश ॥ ३६ ॥

और त्रिदंडहि ग्रहणकी, कृत्तिरही जो वाचि ॥

कांचीपूरण सकलसो, करवायो मनराचि ॥ ३७ ॥

यतिवर लहि आनँद निकर, हरिमंदिर महँ जाइ ॥

बारहिंबार प्रणामकिय, स्तुति अमित सुनाइ ॥ ३८ ॥

वरदराज मंदिर सदा, रामानुज कियवास ॥

सादर संतन बोलिकै, भोजन दिय सहुलास ॥ ३९ ॥

रामानुजको वरदप्रभु, दीन्ह्यो यतिवरनाम ॥

कांचीपूरण देतभे, प्रभुआज्ञाते धाम ॥ ४० ॥

रामानुजको चरित यह, सुनै जो प्रीति समेत ॥

सो संसार असारतजि, वसै मुकुंद निकेत ॥ ४१ ॥

श्लोक—रामानुजायनाथाययतींद्रायमहात्मने ॥

कृपापात्रप्रसन्नायलक्ष्मणार्यायितेनमः ॥ १ ॥

इति श्रीरामरसिकावल्यांकलियुगखंडेकादशोऽध्यायः ॥ ११ ॥

अथ दाशरथि अरु कूरेशकी कथा ॥

दोहा—कांचीपुरके पूर्वदिशि, रह्यौ निकट इक ग्राम ॥

तहँ अनंतदीक्षित रह्यो, विप्र एक मतिधाम ॥ १ ॥

यतिवरको भगिनी पति सोई । अति सुशील तेहि कह सब कोई ॥
ताके भो सुकुमार कुमारा । दाशरथी अस नाम उचारा ॥
वेद वेदांत दांत अति शांता । कमलाकांत दास क्षिति क्षांता ॥
सो सुनि मातुल भक्त उदंडा । आचारज ग्रहीत तिरडंडा ॥
दाशरथी मातुल ढिग आयो । भैने लखि यतिवर सुखपायो ॥
भयो समासृत मातुल पार्हीं । पढ्यो ग्रंथ शतपंथ सदाहीं ॥
भट्ट अनंत एक द्विज रहेऊ । ताके एक आत्मज भयऊ ॥
ताको नाम भयो कूरेशा । सेवक संत श्रीकंत हमेशा ॥
सो कहूँ कांचीपुरमहँ आयो । रामानुजको लखिसुख पायो ॥
भयो शिष्य रामानुज केरो । ज्ञाता वैष्णव शास्त्र घनेरो ॥
दाशरथी कूरेश शिष्य दोउ । यतिपतिअतिप्रियकहतेसबकोउ
कांचीपुरी गुरुके पासा । वसतभये किय शास्त्र विलासा

दोहा—एक समय कांचीपुरी, यादव द्विजकी मात ॥

यतिवरको कहूँ पंथमहँ, पेर्यो अति अवदात ॥ २ ॥

ऊर्ध्वपुण्ड्र सोहत जेहिभाला । शंख चक्र भुज मूल विशाला ॥
भानुसमान भास चहुँ घाहीं । पट कषाय सोहत तनुमाहीं ॥
धरे त्रिदंड उदंड पाणिमें । रति अछिन्नजानकी जानिमें ॥
लखि तिनको यादव द्विजमाता । कियो प्रणाम धाम विख्याता ॥
लौटि भवनको सो चलिआई । यादवको अस गिरा सुनाई ॥
रामानुजसों वैर बढ़ायो । अपनो अति अपवाद बनायो ॥
अब नहिं तासों वैर करीजै । शासनमोर मानि सुत लीजै ॥

यहि विकुंठते हरिपठवायो । जीवउधार हेतु जग आयो ॥
सत्य अनंत अहै अवतारा । वैष्णव मति करिहै परचारा ॥
जो द्विज विष्णुभक्ति नहिं कीना । ताको जन्म वृथा विधि दीना ॥
पढ़ै विपुल विद्या समुदाई । विष्णुभक्ति विन सकल वृथाई ॥
अलंकार जिमि मृतकशरीरा । नहिं सोहत दायक अतिपीरा ॥

दोहा—कांचीपूरण आदिजे, ज्ञान विज्ञान निधान ।

लखि रामानुज आचरण, पूजहि करहि बखान ॥ २ ॥
ताते पुत्र त्यागि सब द्रोहू । रामानुज शरणागत होहू ॥
यादव सुनि जननीके वैना । बोल्यो वचन मानि उर भैना ॥
कही सत्य जननी तैं वानी । मोरेउ उर अतिभई गलानी ॥
शेष रूप आचार्य प्रधाना । रामानुज सम नहिं कोउ आना ॥
पै हम अस मन किय अनुमाना । भूप्रदक्षिणा दै सविधाना ॥
पुनि यतिवरकै निकट सिधारैं । ताको शासन शिरमहँ धारैं ॥
जब जननी बोली मुसक्याई । अबलौं तुव जड़ता नहिं जाई ॥
रामानुजहि प्रदक्षिण देहू । भूप्रदक्षिणा कर फल लेहू ॥
जननी वचन मृषाद्विज जाना । रामानुज मठ कियो पयाना ॥
तहँ शिष्यनयुत यतिवर सोहै । सुरगण युत सुरगुरु मनमोहै ॥
तब यादव अस वचन उचारा । सुनु रामानुज वचन हमारा ॥
शङ्ख चक्र जो करहु विधाना । ताके भाषहु सकल प्रमाना ॥

दोहा—सुनि यादवके वचन तहँ, रामानुज मतिवान ॥

शासन दिय कूरेशको, दीजै सकल प्रमान ॥ ३ ॥

सुनि कूरेश गुरूकी वानी । यादवसों बोल्यो विज्ञानी ॥
ऊर्ध्वपुंङ्गु धारणहित भाला । शङ्ख चक्र भुजमूल विशाला ॥
साधारण जिय ईश्वरभेदा । सबते परहरिको कह वेदा ॥
सगुण कौनविधि ईश्वर जाने । येते प्रश्न जे आप बखाने ॥

उत्तर तासु सुनहु दैकाना । मैं वरणों जस वेद पुराना ॥
 अस कहि तहँ कूरेश सुजाना । लै संत श्रुति शास्त्र पुराना ॥
 वेद पुराण प्रमाण उचारी । दीन्हों सबशंका निरवारी ॥
 यादव सुनत चकित अति भयऊ ताहि विचारत निज घर गयऊ ॥
 सोइ रह्यो जब निजघर जाई । वरदराज कह सपनहिं आई ॥
 यादव अब जो कस बौराना । तोको अबलों कछु न देखाना ॥
 विन रामानुज शरण सिधारे । ह्वैहौनहिं संसारहि पारे ॥
 यादव स्वप्न देखि यहि भांती । चौंकि उठ्यो सेजहि तेहि राती ॥
 दोहा—काह कह्यो यहि मोहिं प्रभु, केहिविधि होइ उधार ॥

करत विचार अपार अस, जागतभो भिनसार ॥ ४ ॥

भोरभये यादव महतारी । गवनी कूप भरनहित वारी ॥
 तेहि मारग ह्वै शिष्यसमेतू । रामानुज हरेपूजन हेतू ॥
 आवतरहे देखि तेहिंकाहीं । यादव मातु गुन्यो मनमार्हीं ॥
 रामानुज रवि सरिस प्रकासा । सकलशास्त्र ज्ञाता हरिदासा ॥
 यासों राखत मम सुत द्वेषा । होई नहिं कल्याण विशेषा ॥
 जो रामानुजको शिषहोई । तौकल्याण कल्पतरु जोई ॥
 यही विचारत गई भवनको । कह्यो बुझाय बोलाइ सुवनको ॥
 होहु जो रामानुज शिष बेटा । तौ होई हरिसों हठि भेंट ॥
 नातौ उभयलोक नशि जाई । और कछु नहिं मोक्ष उपाई ॥
 मातु वचन सुनि यादव बोल्यो । हरिके वचन स्वपनके खोल्यो ॥
 पैनहिं मिथ्यो तासु संदेहू । कियो न रामानुज पद नेहू ॥
 संशय मेटनहित इकवारा । कांचीपूरण भवन सिधारा ॥

दोहा—करि प्रणाम भाषत भयो, मोरे अति संदेहु ॥

सो मेटहु करिकै कृपा, शुभ उपदेशहि देहु ॥ ५ ॥

वरदराज प्रभुके ठिग जाई । मोरि विनय अस देहु सुनाई ॥

केहिविधि हांय मोर कल्याना । दोहो तोहो शासन भगवाना ॥
 कांचीपूरण उच्चो तुरंता । आयो जहां वरद भगवंता ॥
 यादवकी सब विनय सुनाई । तब बोले प्रत्यक्ष यदुराई ॥
 कांचीपूरण तुम द्रुत जाई । यादवसों अस कह्यो बुझाई ॥
 विन रामानुज शरण सिधारे । किमि हैहै भवसागर पारे ॥
 यही हेतुमें स्वपन देखायो । तबहुँ ताहि विश्वास न आयो ॥
 अबहूँ भलो विगरिगो नाहीं । गिरै जाय यतिवर पद माहीं ॥
 दुर्लभ मानुष तनुकदँ पाई । करै जो नहिं कछु मोक्ष उपाई ॥
 ताते कौन अधम जगमाहीं । कूकर शूकर सरिस सदाहीं ॥
 कांचीपूरण सुनि हरिवानी । आय यादवाहि कह्यो बखानी ॥
 चहहु नाश जो माया मोहू । रामानुज शरणागत होहू ॥

दोहा—हरिशासन यादव सुन्यो, मिटिगै संशय शूल ॥

रामानुज ठिग जाइकै, परि पदपंकज मूल ॥ ६ ॥

आंखि बहावत आंसुन धारा । त्राहि त्राहि अस कियो पुकारा ॥
 क्षमा करहु अपराध हमारा । तुम विन अब न मोर उद्दारा ॥
 असकहि उच्चो उठाये नाहीं । भई दया यतिवर उरमाहीं ॥
 कह्यो वचन रामानुज स्वामी । यादव दुख हरिहैं खगगामी ॥
 उठहु उठहु यादव द्विजराई । तजहु सकल शंका दुखदाई ॥
 तब उठि यादव दोउ करजोरी । कह्यो नाथ विनती सुनु मोरी ॥
 पांचहु संस्कार मम कीजै । बूझत ऐंचि मोहिं प्रभु लीजै ॥
 तब यादव द्विजको यतिराजू । करिकै सकल सुभंगल काजू ॥
 पाँचहु संस्कार प्रभु कीना । गोविंद दास नाम तेहि दीना ॥
 वैष्णव ग्रंथनि सकल पढ़ायो । पुनि प्रपत्तिको धर्म सुनायो ॥
 पुनि रामानुज आज्ञा दीनी । तुम वैष्णवकी निंदा कीनी ॥
 ताते वैष्णव ग्रंथ बनावहु । सकल महाअपराध मिटावहु ॥

दोहा—तब यादव गुरुवंदिकै, करिकै विमल विचार ॥

वेद पुराण प्रमान धरि, लै सब शास्त्रनसार ॥ ७ ॥

रच्यो ग्रंथ सब ग्रंथनि उच्चै । नाम जासु याति धर्म समुच्चै ॥
ग्रंथ बनाय गुरू ठिग ल्यायो । गुरूको सकल सुनाय शोधायो ॥
तामें कियो विशेष प्रकासा । ग्रहणकरब त्रिदंड संन्यासा ॥
सुनि रामानुज भये प्रसन्ना । मान्यो ताहि अनन्य प्रपन्ना ॥
यादव रामानुज पद केरी । सेवत कीन्हो प्रीति घनेरी ॥
कछुक कालमहँ गोविंद दासा । लहि गुरुकृपा गयो हरिवासा ॥
हरि महिमा देखहुरे भाई । यहि विधिनिजजन लेत बचाई ॥
सोइ यादव है दूसर नाही । जहँ रामानुज पढ़ने जाहीं ॥
सोइ यादवहै दूसर नाही । हतन चह्यो रामानुज काहीं ॥
सोइ यादव है दूसर नाही । जेहि रामानुज देखि डराहीं ॥
सोइ यादवहै दूसर नाही । छुवत नरह वैष्णव परिछाहीं ॥

दोहा—सोइ यादव यतिवर चरण, शरणागत भो आइ ।

लहि गुरु कृपा विकुंठको, गयो निसान बजाइ ॥ ८ ॥

रामानुज कांचीपुर माहीं । वसे पढावत शिष्यन काहीं ॥
उतै रंगपुर महँ सब संता । यामुन विरहित दुखी अनंता ॥
कोऊ नहि आचार्य रह्यो तहँ । शास्त्र पढ़ावै सब संतन कहँ ॥
तब सब संत रंगपुर वासी । रामानुजके दर्शन आसी ॥
रंगनाथके द्वारहि आये । बार बार अस विनय सुनाये ॥
नाथ जो रामानुजै बोलावहु । तौ हम सबन कृतार्थ बनावहु ॥
असकहि निशिमहँ संत तहाँही । वसे रंगमंदिर इकठाहीं ॥
दीन्हो राति स्वप्न भगवाना । कोउ जन कांची करै पयाना ॥
मेरी लिखी पत्रिका प्यारी । वरदराज कहँ देय सिधारी ॥
मम सिंहासन निकट सोहाती । मिलिहै भोर लिखी ममपाती ॥

भोर भये सब संत सिधाये । पट खोले पाती तहँ पाये ॥
लै पाती इक द्विजकर दीन्हे । कांचीपुरहि विदा तेहिं कीन्हे ॥
दोहा—सो द्विज कांची आइकै, वरदराज ढिग जाइ ।

करि प्रणाम पाती दियो, अपनो नाम सुनाइ ॥ ९ ॥
रंगनाथकी पाती पायो । वरदराज अतिशय सुख छायो ॥
यह वृत्तांत लिखो तेहि माहीं । रामानुजै देहु हम काहीं ॥
रंगनाथ यह वरदराज यह । करहिं याचना जानि काज कहा ॥
तब तेहिं निशा वरद भगवाना । पाती उत्तर लिख्यो प्रमाना ॥
माँगे ते सब कछु दै डारत । पै नहिं अपनो प्राण निकारत ॥
रामानुज मो प्राण समाना । कैसे तुमहिं देहिं भगवाना ॥
अस पातीलिखिनिशि धरि राख्यो । पूजक पट खोलन अभिलाख्यो
भोर भये खोल्यो पट काहीं । पाइ गयो पत्रिका तहाँहीं ॥
रंगनाथको विप्र बोलाई । पूजक दिय पत्रिका बुझाई ॥
सो द्विज तहँ कोहु सों न बतायो । पाती पाइ रंगपुर आयो ॥
पाती रंगनाथ कहँ दीन्हो । संतनसों सो वर्णन कीन्हो ॥
तहँ यामुनसुत इक मतिमाना । नाम जासु वररंग बखाना ॥
दोहा—रंगनाथ वररंगको, कह्यो स्वप्नमें आइ ॥

रामानुजको ल्याइये, कांचीपुरमें जाइ ॥ १० ॥
गानशास्त्रके तुम अतिज्ञाता । गाइ रिझाइहु वरद विख्याता ॥
पट भूषण जो कछु तोहिं देहीं । तौ तुम लिह्यो न मोर सनेही ॥
माँगेहु रामानुज कहँ प्यारे । और वस्तु नहिं नेकु निहारे ॥
दिख्यो स्वप्नसो अस तेहि राती । भई रंगवर शीतल छाती ॥
भोर भये वररंग तुरंता । कांचीपुर गमन्यो मतिवंता ॥
वरदराजके मंदिर आयो । तहँ प्रभुको चरणामृत पायो ॥
तब वररंग पहिरि पट भूषण । नाचन गायन लग्यो अदूषण ॥

सुनि वररंग केर मृदु गाना । भये प्रसन्न वरद भगवाना ॥
 वरदराज प्रत्यक्ष बखाना । हे वररंग माँगु वरदाना ॥
 तब वररंग कह्यो कर जोरी । जो आशा पूरहु प्रभु मोरी ॥
 तब माँगहु मनको वरदाना । नहीं करौ किमि वृथा बखाना ॥
 वरद कह्यो द्विज रमा विहाई । माँगहु जो चैहो सो पाई ॥

दोहा—तब वररंग कह्यो वचन, रामानुजको देहु ॥

अब न टरहु कहिकै हरी, निज प्रण सुधि करलेहु ॥ ११
 वरद कह्यो अति दुर्लभ माँगै । पै हराइ लिय मोकहँ आगे ॥
 ताते रामानुजको दैहौ । किमि असत्य निज प्रण करिलैहौ ॥
 अस कहि रामानुजै बोलाई । वररंगहि को पाणिधराई ॥
 वरद दियो रामानुज काहीं । भाष्यो जाहु रंगपुरमाहीं ॥
 रामानुज करि दंड प्रणामा । आयो तुरत आपने धामा ॥
 तहँ सब शिष्यन तुरत बोलाई । चल्यो रंगपुर कहँ दुख छाई ॥
 ज्यों पितुगृहते पतिगृह माहीं । कन्या जाति महादुखमाहीं ॥
 वरदराज सुमिरत बहुवारा । रंगनगर तिमि गयो उदारा ॥
 कावेरी महँ मज्जन कीन्हो । द्वादश तिलक सबै अंगलीन्हो ॥
 तब वररंग रंगमंदिरचलि । रामानुज आये नाशककलि ॥
 खबरि दियो यह रंगनाथको । बारहिं बार नवाइ माथको ॥
 रामानुजकी सुनत अवाई । रंगनाथ अति आनँद पाई ॥

दोहा—रंग कह्यो वररंगसों, पढ़त वेद सब संत ॥

रामानुज अगवान हित, यहि क्षण सकल व्रजंत ॥ १२ ॥
 रंगनाथकी सुनि यह वानी । रामानुजको आगम जानी ॥
 पूर्णाचार्य सबन सँग लीन्हे । अगवानी हित गवनहि कीन्हे ॥
 ताते रामानुजौ सिधाई । गिरत भये पूरण पद धाई ॥
 उभय वोर वैष्णव अभिरामा । किये परस्पर दंड प्रणामा ॥

पूरण आदिक संत सुजाना । लै रामानुज किये पयाना ॥
गये रंग मंदिर महँ जबहीं । लीला रंगनाथ प्रभु तबहीं ॥
चलि सतयें प्रकारहीं द्वारा । लिय अगवानी मोद अपारा ॥
रामानुज वैष्णवन समेता । अंतःपुरगे रंग निकेता ॥
महारंगको दर्शन लीन्हो । करि प्रणाम विनती अस कीन्हो ॥
मेरे हित आगवन गोसाई । कीन्हो कहा बंधुकी नाई ॥
त्रिभुवन धनी रंग भगवाना । मैं लघु सेवक अति अज्ञाना ॥
परगट रंगनाथ तब भाषे । हमहूँ तुम दर्शन अभिलाषे ॥

दोहा—जो मैं अपने दासको, करौं अशन सतकार ॥

दीनबंधु यह नामतौ, कोपुनि लेइ हमार ॥ १३ ॥

रामानुज तुम हौ सब लायक । करौ उभय विभूति कर नायक ॥
सुनि रामानुज प्रभुकी वानी । दै परदक्षिण आनँद मानी ॥
गये रंगमंदिरके भीतर । दर्शन कीन्हो महा मूर्तिकर ॥
लै प्रसाद तहँते पुनि आई । बैठ गरुड़ मंदिर सुखपाई ॥
वैष्णव यूह तहाँ जुरि आयो । श्रीमन्नारायण ख छायो ॥
सकल बोलाइ रंग अधिकारी । तहँ रामानुज गिरा उचारी ॥
जौन नमनुहै जेहि अधिकारै । सावधान सो ताहि सँवारै ॥
जो कछु काम विगरि अब जाई । अवाशि सो दंड पाइहै भाई ॥
पूरणाचार्य कह्यौ तब बाता । सत्य कह्यो शठकोप विख्याता ॥
कोइक हमरे कुलमहँ होई । यतिवर ताहि कही सब कोई ॥
सो श्रीवैष्णव मत प्रगटैहैं । कलियुग धर्म धूरि करिहैंहैं ॥
यामुन निज यात्राके काला । कह्यो वचन यह बुद्धि विशाला ॥

दोहा—हरिको भक्त अनन्य इक, कछु दिन महँ इत आइ ॥

सुखी करैगो जगत सब, वैष्णव मत प्रगटाइ ॥ १४ ॥

सो रामानुज तुमहीं अहहू । वैष्णव मत निर्वाह हित करहू ॥

सुनि रामानुज पूरण वानी । पूरणके पद परचो विज्ञानी ॥
 कह्यो नाथ रावरी बड़ाई । मोते नहिं कबहूँ बनि आई ॥
 अस कहि तहँ ते उठे उदारा । देखन लगे प्रकार प्रकारा ॥
 तब परकालहि बहुत सराही । वसे रंगपुर परम उछाही ॥
 वरदराज त्यागन दुख जेतो । निरखत रंग मिल्यो सब तेतो ॥
 जिन जिन पर रामानुज केरी । परी दीठि भरि दया वनेरी ॥
 ते ते सकल त्याग संसारा । वसते भये विकुंठ मँझारा ॥
 अनुपम रामानुज परभाऊ । जाहिर जाको शील सुभाऊ ॥
 जब कांचीते कियो पयाना । बोलि वैष्णवन चारि सुजाना ॥
 कह्यो इकांत वैष्णवन काहीं । गवनहु शैल पूर्णढिग माहीं ॥
 मम फूफूको सुत गोविंदा । वैष्णव मतकी भाषत निंदा ॥

दोहा—वैष्णव ताको करन हित, शैलपूर्ण मतिवान ॥

काल हस्तिपुरको अबै, आये ज्ञाननिधान ॥ १५ ॥

सो तुम जाइ तहाँ है शांता । जानि सकल तहँ कर वृत्तांता ॥
 आवहु रंगनगर मम पासा । करहु मोहिं वृत्तांत प्रकासा ॥
 अस कहि वैष्णव तहाँ पठाये । रंगनगर रामानुज आये ॥
 कछुक कालमहँ वैष्णव तेई । आये रंगनगर हरि सेई ॥
 रामानुज पद वंदन करिकै । लागे कहन खबरि सुख भरिकै ॥
 काल हस्तिपुर महँ हे नाथा । आये शैलपूर्ण द्विज साथी ॥
 बैठे एक तडागहि तीरा । शिष्यन शास्त्र पढावत धीरा ॥
 तहँ गोविंद घट कांधे धरिकै । आयो भरन सलिल श्रम करिकै ॥
 घट भरि चलयो भवन कहँ जवहीं । शैलपूर्ण बोले तेहिं तवहीं ॥
 का फल है घट भरि लै जावहु । अवसर होइ तो हमहिं बतावहु ॥
 तब गोविंद कही नहिं वानी । गयो गेह गुनि गिरा विज्ञानी ॥
 गयो भरन जल फेरि तहाँहीं । शैलपूर्ण तब मारगमाहीं ॥

दोहा—लिखि कागद श्लोक इक, दियो डारि तेहि ठाम ॥

सो श्लोक उठाइ लिय,चलि गोविंद मतिधाम ॥ १६ ॥

सो लाग्यो चितवन चहुँ वीरा । लख्यो शैलपूरण तेहि ठोरा ॥
तिनके निकट जाइ अस भाख्यो । को यह पत्र डारि पथ राख्यो ॥
दीजै हमको अर्थ बताई । शैलपूर्ण तब अर्थ सुनाई ॥
औरहु भाषो शास्त्र प्रमाणा । तब गोविंद बहु वाद बखाना ॥
भो शास्त्रार्थ दहुँनसों भारी । हव्यो गोविंद न सक्यो उचारी ॥
ऐसी सुनि वैष्णव मुख वानी । शैलपूर्ण कहँ विपुल बखानी ॥
रामानुज सब संतन काहीं । कह्यो प्रमाण अनेक तहाँही ॥
पुनि संतनसों पूछन लागे । गोविंद तहाँ रहेकी भागे ॥
वैष्णव कहनलगे पुनि गाथा । गुरुहि सरहि जोरी युग हाथा ॥
सुनहु यतीश्वर तेहि सरतीरा । शैलपूर्ण जब कह मतिधीरा ॥
तब गोविंदहि उतर न आयो । तहँते तुरतहि पेलि परायो ॥
शैलपूर्ण व्यंकट गिरि आये । दिवस तीसरे फेरि सिधाये ॥

दोहा—वनमें शिष्यन जोरि कै, सहस गीतिको अर्थ ॥

लगे पढ़ावन प्रीतिसों,मेटत सकल अनर्थ ॥ १७ ॥

फूल लेन तब अतिशय चायो । तेहि वन गोविंद राज सिधायो ॥
पाटलि तरुमहँ चढ़े गोविंदा । तोरन लगे कुसुम सानंदा ॥
चौथे गीति माहँ तेहि काला । निकसी तहँ यह कथा विशाला ॥
नारायण के नाभी तेरे । कह्यो कमल इक पत्र घनेरे ॥
ताते चारि वदन प्रगटाना । ताते प्रगट्यो जगत महाना ॥
नारायण सर्वेश्वर अहँहीं । ऐसे वेद पुराणहु कहहीं ॥
नारायणको कुसुम चढ़ावै । सो जगमें अनंत फल पावै ॥
यही कियो त्रैवार उचारा । तब गोविंद मन माहँ विचारा ॥
नारायण त्रिभुवनके नाथा । धरहि रुद्र विधि जेहि पद माथा ॥

ताते नारायणको ध्याऊँ । तौ भवसिंधुपार मैं पाऊँ ॥
असगुणि कूदि तुरत तरु तेरे । गोविंद त्राहि त्राहि मुखटेरे ॥
गिरचो शैल पूरणके चरणा । नाथ भयो मैं तिहरे शरणा ॥

दोहा—अबलों म्वहिं अति भ्रम रह्यो, तजि नारायण काहिं ॥

भजत रह्यो औरे सुरन, लग्यो ठिकाना नाहिं ॥ १८ ॥

बार बार अस कहत गोविंदा । तजत शैलपूरण पदद्वंदा ॥
शैलपूर्ण तब गोविंद काहीं । लियो लगाइ तुरत हिय माहीं ॥
झारत तनु रज कोमल वैना । बोल्यो गोविंद सोंभरि चैना ॥
गई सो गई सुरति नाहिं कीजै । लई सो लई ताहि मन दीजै ॥
अब करु हरि पद दृढ़ विश्वासा । ते प्रभु करिहै भव निधि नासा ॥
तब गोविंद अति आदर कीन्हो । शैलपूर्णको गुरु अस चीन्हो ॥
गोविंद वैष्णव भये तहाँहीं । भयो सोर चहुँकित पुर माहीं ॥
तब गोविंदके सिंगरे संगी । आये तेहि समीप मति भंगी ॥
शैल पूर्ण सों बोले बाता । तुम तौ जादू मैं अति ज्ञाता ॥
गोविंदको धौं कहा खवायो । हमरे साथी को बौरायौ ॥
शैलपूर्ण तब कह मुसिकाई । पूँछिलेहु गोविंद सों भाई ॥
जो हम कछू सिखाये है हैं । तो गोविंद आपहि कहि दैहैं ॥

दोहा—शैलपूर्णके वचन सुनि, सिंगरे कुमती धाइ ।

लियो गोविंदहि घेरितहैं, गहे हाथ अनखाइ ॥ १९ ॥

कहे वचन अति आँखि तरेरी । चलौ भवन होती अति देरी ॥
अपनो धर्म करहु मन लाई । कोहुक केह गये बौराई ॥
तब गोविंद निज हाथ छँडाई । कह्यो वचन निज नैनदेखाई ॥
जबलों हम तुमही महँ रहे । तबलों तिहरो शासन गहे ॥
जबते त्यागि दियो हम तुमहीं । तबते तुम तुमहीं हम हमहीं ॥
तब सब गये मानि हिय हारी । गोविंद सुमिरण लग्यो मुरारी ॥

शैलपूर्ण ढिग किय निशि वासा । गोविंद भो अनन्य हरिदासा ॥
तेहि निशि वैष्णव द्रोहिन काहीं । शंकर भाष्यो स्वप्ने माहीं ॥
नास्तिक वैष्णव धर्म बिगारचो । वैष्णव ताको फेरि प्रचारचो ॥
ताते जो करिहौ वरियाई । तौ तिहरो हाटि जई नशाई ॥
गोविंदको नहिं रोकहु कोई । यह अनन्य हरिको जन होई ॥
हरिद्रोही अस स्वप्नो देखी । शैलपूर्ण सों कह्यो विशेषी ॥

दोहा—निज निज भवनन गमन किय, ह्वैगे सकल निरास ॥

गोविंदको निज संग लिय, शैलपूर्ण हरिदास ॥ २० ॥

संतन युत व्यंकट गिरि आये । गोविंदको निज निकट बोलाये ॥
संस्कार पांचहु तेहि कीन्हे । वैष्णव शास्त्र पढाइ सुदीन्हे ॥
अब व्यंकटगिरिमे गोविंदा । सेवत शैल पूर्ण सानंदा ॥
यह तहँको वृत्तांत विशाला । जानहु यातिपाति दीन दयाला ॥
यातिपाति सुनि गोविंद वृत्तांता । मान्यो महामोद दुखसांता ॥
किय सत्कार वैष्णवन काहीं । भली सुनाई आइ इहांहीं ॥
पुनि रामानुज सिंगरे संतन । विदा कियो तिन घरमतिवंतन
तहँते आपहु उठे तुरंता । गये रंगमंदिर सुखवंता ॥
करि प्रणाम प्रभुको बहु वारा । तनुपुलकित अस वचन उचारा
तुम राखहु संतन मर्यादा । दूरि करहु सब जगत विषादा ॥
तुम सम प्रभु जो जग नहिं होतो । संतनकी सुधि राखत कोतो ॥
हैसंतन अवलंब तुम्हारा । द्रवहु सदा देवकी कुमारा ॥

दोहा—असप्रभुसों विनती कियो, जानि सकल कृतकाम ।

रामानुज स्वामी तुरत, आवतभे निजधाम ॥ २१ ॥

येकसमय यतिराज प्रभु, करि मनमाँह विचार ।

गवन कियो गुरुदरसहित, पूर्णाचार्यअगार ॥ २२ ॥

गुरुपद द्रंदन वंदन करिकै । जोरि पाणि कहअतिसुखभरिकै ॥

यामुनको नहिं दर्शन पायो । ताते मोहि आंते शोक सतायो ॥
 शोक जनित सिंगरो दुखघोरा । हरि लीन्हो हरि गुरुतुम मोरा ॥
 मैहौं तुव चरणनको दासा । करहु मोहि उपदेश प्रकासा ॥
 सुनि रामानुजके अस वैना । महापूर्ण बोल्यो भरि चैना ॥
 मंत्ररत्न है मंत्र अनूपा । जानहु सब मंत्र नकर भूपा ॥
 द्वै अस जाको नाम उचारा । कारक कोटि जन्म अवछारा ॥
 सब विधि भक्ति मुक्तिको दाता । जन रक्षक मानहु पितु माता ॥
 चारिहु वर्ण माहिं जन कोई । जपै जो जाहि पूज्य सतिसोई ॥
 संसारार्णवके तारण कारण । वेदमूल अधमनि उद्धारण ॥
 असद्वैमंत्र पतित पावनकर । तुम्हैं देत हम लीजै यतिवर ॥
 असकहि पूर्णाचार्य महाना । दिये द्वै मंत्र सुनाइ सुकाना ॥

दोहा—न्यायतत्त्व गीतार्थ तिमि, व्यास सूत्र त्रैसिद्ध ।

पंचरात्र आदिक सबै, उपदेश्यो गुणि सिद्ध ॥ २३ ॥
 पुत्र पुंडरीकाक्ष नामजेहि । रामानुजको शिष्य कियो तोहिं ॥
 महापूर्णपुनि कह असवानी । गवनहु गोष्ठीपुर विज्ञानी ॥
 तहँहै गोष्ठीपूरन स्वामी । भक्त अनन्य विहंगमगामी ॥
 तिनसों शास्त्र अर्थ सुनि लेहू । अस नहिं आवत दूसर केहू ॥
 रामानुज सुनि गुरुकी वानी । गोष्ठीपूर्ण बन्यो सुख मानी ॥
 गोष्ठीपूरणके ढिग जाई । बोल्यो वचन चरण शिरनाई ॥
 मोहिं मंत्रार्थ देहु तुम नाथा । बार बार नाऊं पदमाथा ॥
 गोष्ठीपूरण गिरा उचारी । याको अब कोउनहि अधिकारी ॥
 गोष्ठीपूरण भो पुनि मौना । रामानुज आयो निज भौना ॥
 कछु दिन बीते रंग नगर महँ । भयो महाउत्सव घर घर तहँ ॥
 गोष्ठीपूरण तब सुखपायो । उत्सव लखन रंगपुर आयो ॥
 हरि मंदिर दर्शन हित गयऊ । पूजक ताहि कहत अस भयऊ ॥

दोहा-रंगनाथ शासनकरत, तुम रामानुज काहिं ।

मंत्रार्थ उपदेशियो, गुनि सज्जन मन माहिं ॥ २४ ॥
तब गोष्ठीपूरण अस भाष्यो । प्रथमहि रंगनाथ कहि राष्यो ॥
होई जो याको अधिकारी । विना परीक्षा लिहे विचारी ॥
तेहि मंत्रार्थ कबहुँ ना दीजै । अबशासन यहकीसो कीजै ॥
गोष्ठीपूरण सों पूजक पुनि । कह्यो वचन यहि शासनकोगुनि ॥
रामानुज सब गुणनिनिधाना । याके सम जगमे को आना ॥
तुम मंत्रार्थ देहु यहि जाई । जियकी शंका सकल विहाई ॥
गोष्ठीपूरण सुनि हरि शासन । रामानुजहि कह्यो दुखनाशन ॥
रामानुज मम भवनहि आवहु । तब मंत्रार्थ अवशि तुम पावहु ॥
असकहि गोष्ठीपूरण गयऊ । जात तहैं रामानुज भयऊ ॥
पैमंत्रार्थ न किय उपदेशा । यतिवर आयो बहुरि निवेशा ॥
यहि विधि यतिवर वार अठारा । गोष्ठीपूरण भवन सिधारा ॥
पैनहिं उपदेश्यो मंत्रार्थ । करन परीक्षा गुणि परमारथा ॥

दोहा-बारवोनैसे पुनि गयो, गोष्ठीपूरण पास ।

जाहु जाहु सो असकह्यो, रोवत चलयो निरास ॥ २५ ॥
रामानुज निज भवन सिधारी । लंघन कियो मानि दुखभारी ॥
गोष्ठीपुरको कोउ यक संता । आयो रंगनगर मतिवंता ॥
सो रामानुज दशा निहारी । गोष्ठीपूर्णहि जाइ उचारी ॥
तब गोष्ठीपूरण निजदासा । पठवायो रामानुज पासा ॥
सो वैष्णव रामानुज काहीं । कह्यो वचन अति आनँद माहीं ॥
गोष्ठीपूरण तुमहि बोलायो । तुमको लेन हेतु मैं आयो ॥
अब मंत्रार्थ तुमको दैहैं । अब निराशनहिं तुमहिं फिरैहैं ॥
चलहु अकेले सकल विहाई । सुनि रामानुज अति सुखगाई ॥
गोष्ठीपूरण गुरुके गेहू । गवन्यौ रामानुज करि नेहू ॥

॥ तब कूरेश दाशरथि दोऊ । गवने रामानुज सँग वोऊ ॥
 तब गोष्ठीपूरणके दासा । रामानुजसूँ वचन प्रकासा ॥
 हरि गुरु कह्यो अकेले आवहु । दंडजनेऊ भरि सँग लयावहु ॥
 दोहा—तुम अपने द्वै शिष्यको, लिये संग कसजात ॥

दूषण देहैं गुरु अवशिहम इत तिनहिं डेरात ॥२६॥
 तब रामानुज वचन उचारा । लेइ बनाइ न करहु खेंभारा ॥
 यहि विधि कहत पंथ महँवानी । गोष्ठीपुर आये सुखमानी ॥
 गोष्ठीपूरण निकट सिधारे । कियो दंडवत पाणि पसारे ॥
 रामानुजहि शिष्यथुत देखी । गोष्ठीपूरण अनुचित लेखी ॥
 कहयतिराजहि आँख देखाई । लयाये केहिहित शिष्य लेवाई ॥
 हमतौ कहि पठयो तुम पाहीं । और न आवै कोइ सँग माहीं ॥
 यक त्रिदंड दूसर उपवीता । लइयो ये द्वै संग पुनीता ॥
 तब रामानुज कह कर जोरी । मोसे नाथ भई नहिं खोरी ॥
 दंड और उपवीतहि काहीं । तुम कह लयावहु निजसँग माहीं ॥
 दोऊ शिष्य दंड उपवीता । गुरु लयायो मैं परमपुनीता ॥
 तब गोष्ठीपूरण गुरु बोले । को उपवीत दंड केहि तोले ॥
 तब रामानुज गिरा उचारी । हे गुरु असजिय मैं निरधारी ॥

दोहा—दाशरथीको जानियो, मोर त्रिदंड हमेश ॥

तिमि जनेउ कूरेश हैं, नहिं दूसर यहि देश ॥२७॥
 तब गोष्ठीपूरण अस भाषे । यदपि जनेउ दंड करि राषे ॥
 तदपि अकेले तुम इत आवहु । मंत्रराज लहिकै सुख छावहु ॥
 इनको तुमही किय उपदेशा । बोलि दाशरथि और कुरेशा ॥
 पुनि रामानुज जाइ अकेले । बैठे गोष्ठी पूरण भेले ॥
 तब गोष्ठीपूरण लागि काना । मंत्रराज मंत्रार्थ बखाना ॥
 दै मंत्रार्थ पात्र पहिचाने । गोष्ठीपूरण अति सुखमाने ॥

गोष्ठीपूरण कह बहुवारा । मंत्रनकोहुसे कियो उचारा ॥
महामंत्र यह गोपन योगू । दायक मुक्ति भुक्ति कर भोगू ॥
एवमस्तु कहि यतिवर ज्ञानी । करि प्रणाम पद परसत पानी ॥
आयो बहुरि रंगपुर काहीं । धन्य जन्म निज गुनि मन माहीं ॥
रंगनगरमहँ महा विशालै । रह्यो येक नरहरिको आलै ॥
तहँ आयो जब माधव मासा । नरहरि जन्म उछाह प्रकासा ॥

दोहा—होत भयो उत्सव महा, नरहरि जन्म अनंद ॥

देश देशते आइकै, जुरे संतके वृंद ॥ २८ ॥

अति संवर्ष भयो पुरमाहीं । चहुँकित साधु समाज देखाहीं ॥
तब रामानुज कियो विचारा । जुरे सकल इत संत अपारा ॥
अष्टाक्षरते पर कछु नाहीं । श्रवण परत अध कोटि नशाहीं ॥
ताते करौं अवशि यह काजा । चढ़िकै इक ऊँचे दरवाजा ॥
अष्टाक्षरको करौ पुकारा । होइ अनेक अधम उद्धारा ॥
अस विचार रामानुज स्वामी । सुमिरि अनन्य मंजुपह गाथी ॥
तेहि दिन भई जबै अधराता । उठि अकेल सज्जन सुखदाता ॥
चढ्यो उत्तंग रंग दरवाजा । जहाँ जुरी सब संत समाजा ॥
तहँते रामानुज बहुवारा । किय अष्टाक्षर मंत्र उचारा ॥
तहँ चौहत्तर जनके काना । परत भयो सो मंत्र महाना ॥
तेचौहत्तर भेजन योगी । भाजन मुक्ति महासुख भोगी ॥
तेइ चौहत्तर पीठ कहावैं । अबलों दक्षिणमें सब ठावैं ॥

दोहा—श्रीअष्टाक्षर मंत्रको, यतिवर कीन पुकार ।

गोष्ठीपूरणदास बहु, सुने जे रहे अगार ॥ २९ ॥

गोष्ठीपूरण पहुँ सब जाई । रामानुजकी दशा सुनाई ॥
नाथ जो गुप्त मंत्र तुम दीन्हो । रामानुजको सज्जन चीन्हो ॥
वरजि दियो भलभलतेहिं काहीं । किह्यो प्रकाश कबहुँ यहि नाहीं ॥

तौन मंत्र रामानुज जाई । ऊंचे चढ़ि ऊंचे गोहराई ॥
 सबको दीन्हो मंत्र सुनाई । अनुचित जानि कहे हम आई ॥
 गोष्ठीपूरण मुनि यह हाला । यतिवर पर किय कोप कराला ॥
 संतन कह्यो यही छन जाई । ल्यावहु रामानुजै लेवाई ॥
 संत आइ रामानुज काहीं । तेहि क्षण गये लेवाइ तहाँहीं ॥
 गोष्ठीपूरण ताहि विलोकी । कियो कोप है अतिशय सोकी ॥
 कह्यो वचन रे मूर्ख प्रधाना । जो मैं दीन्हों मंत्र महाना ॥
 महा गोप सब शास्त्रन सोई । कबहुँ अधर बाहिर नहिं होई ॥
 भली तरा करि तोरि परीक्षा । तब मैं दीन्हों लखि तुव इक्षा ॥

दोहा—बार अनेकानि तोहिं मैं, दीन्हो शपथ धराइ ॥

काहुसों कबहुँ नहीं, दीजो मंत्र सुनाइ ॥ ३० ॥

जो तैं मंत्र प्रकाशित करिहै । ताते अवशि नरकमहँ परिहै ॥
 मंत्रराजसों परम प्रधाना । रंगद्वार चढ़ि तुङ्ग मकाना ॥
 मंत्र राज बहु बार पुकारा । सुनत भये तहँ मनुज अपारा ॥
 गुरुशासन तैं कीन्हो भंगा । दीसततैं मनु मत्त मतंगा ॥
 कहु गुरुद्रोह केर फलकाहै । तेरी मति सब शास्त्रन माहै ॥
 तब रामानुज कह कर जोरी । सुनहु नाथ विनती अस मोरी ॥
 प्रथमहि तुम अस किय उपदेशा । यह अष्टाक्षर रूप रमेशा ॥
 देत तुमहिं सादर सो लीजै । कबहुँ काहुसों नहिं कहि दीजै ॥
 जाके कान परत यह मंत्रा । सो विकुंठ कहँ जात स्वतंत्रा ॥
 पुनि नहिं आवत यहि संसारा । पावत हरि सेवन सुखसारा ॥
 विना परिक्षित अरु विन आशा । जो कोउ करै मंत्र प्रकाशा ॥
 सो विशेषि जन नरक सिधारै । ऐसो वेद पुराण उचारै ॥

दोहा—सो अपने मनमें कियो, मैं यह विमल विचार ।

चढ़ि उत्तंग अति भवनमें, मंत्राहि करौं उचार ॥ ३१ ॥

॥ यह नृसिंह उत्सवके काजा । लाखन आई संत समाजा ॥
 मंत्र परी यह जिन जिन काना । करिहैं ते वैकुंठ पयाना ॥
 मैं इक नरक जाउँ तौ जाऊँ । जनन परमपदको पहुँचाऊँ ॥
 नरक गये मम मंत्र पुकारे । हरिपुर लाखन जीव सिधारे ॥
 तौ नहिं नाथ मोरि कछु हानी । नरक गवनमोहिं अति सुखदानी ॥
 नाथ यही मैं कियो विचारा । किय अष्टाक्षर मंत्र पुकारा ॥
 रामानुजके वचन सुहाये । गोष्ठीपूरण सुनि सुखपाये ॥
 याकी जिय पर दयाअपारा । सांचो अहै शेष अवतारा ॥
 अधम उधारण हित जग आयो । जीवन हित निज दुख विसरायो ॥
 गोष्ठीपूरण यही विचारी । मिले दौरि निज भुजा पसारी ॥
 कहत भये तैं गुरू हमारा । रह्यो न पूरव मोहिं विचारा ॥
 तेरो नाम अहै मनाथा । रह्यो मैं तिहरैलैसाथा ॥

दोहा—रामानुजको बोलि पुनि, अपने ढिग बैठाइ ।

चर्मवाक्य दीन्हो हुलसि, जिमि अर्जुन यदुराइ ॥३२॥
 पुनि अपनो आत्मज बोलवायो । रामानुजको शिष्य करायो ॥
 पुनि गोष्ठीपूरण कह बाता । रंगनगर गवनहु तुम ताता ॥
 यामुन सुवन नाम वररंगा । तासों करहु अवशिसतसंगा ॥
 यामुनतेहि गुप्तार्थ पढ़ायो । सो तुम लेहु जाइ मन भायो ॥
 सुनि गोष्ठीपूरण की वानी । रामानुज गवने सुख मानी ॥
 सँगमहँ दाशरथी कूरेशा । औरशिष्य सब चले सुवेशा ॥
 गोष्ठी पूरण सुतमाति धामा । चल्यो सौम्य नारायण नामा ॥
 रंग नगर रामानुज आयो । अपने भवन वस्यो सुखछायो ॥
 अष्टाक्षर जो कियो पुकारा । भयो अनेकनि जीव उधारा ॥
 यह पुहुमीतल मैं अश छायो । रामानुज सों कोउ नहिं भायो ॥
 मंत्र दान करि यति गणराजू । कियो सकल मनुजन कृत काजू ॥

रंगनाथ मंदिर पुनि गयऊ । सब वृत्तांत कहत तहँ भयऊ ॥

दोहा—रामानुजके वचन सुनि, रंगनाथ कहहै वैन ॥

जीव उधारचो भलकियो, सबहु चैन युतऐन ॥३३॥

इति श्रीरामरसिकावल्यां कलियुगखंडेएकादशोऽध्यायः ॥ ११ ॥

ऐकसमय कूरेश सुजाना । रामानुजसों वचन बखाना ॥
चरम अर्थ मोकूँ प्रभु देहू । तब रामानुज कह युतनेहू ॥
गुरु गोष्ठीपूरण अस भाष्यो । जो चरमार्थ पढन अभिलाष्यो ॥
सो जो वर्ष करै ढिगवासा । नहि कीन्ह्यो तुम चरण प्रकासा ॥
तब कूरेश कही असवानी । परै न मोहिं सरी गति जानी ॥
तब रामानुज वचन प्रकासा । करौ जो एक मास उपवासा ॥
तौ संवत्सरको फल होई । पैहौ चरम अर्थ सुखसोई ॥
तब कूरेश महासुख मानी । कियो मास उपवास विज्ञानी ॥
चरम अर्थ रामानुज दीन्हो । जेहि कूरेश ग्रहण करिलीन्हो ॥
दाशरथी गुरुसों कहजाई । चरम अर्थ हमहूँ प्रभुपाई ॥
यतिवर दाशरथीसों बोल्यो । गुरुसों मैं अस आयसुबोल्यो ॥
कूरेशहि चरमारथ दैहो । दुसरेसों यह कबहुँन कैहो ॥

दोहा—गोष्ठीपूरण निकट चलि, चरमारथ तुम लेहु ॥

उनकी अति सेवा करौ, देहैं सहित सनेहु ॥ ३४ ॥

दाशरथी सुनि यतिवर वानी । गोष्ठीपुरहि गयो मुदमानी ॥
गोष्ठीपूरण पद शिर नायो । चरम अर्थ दीजै अस गायो ॥
गुरुता कर अधिकारन हेरी । तासों लेत भयो मुख फेरी ॥
दाशरथी तहँ वसि षटमासा । सेवन कियो लगाये आसा ॥

गुरु कहक्यों पद सेवत मोरा । यतिवरको संबंध न तोरा ॥
 को तुम कौनहेतु इत आये । दाशरथी तब वचन सुनाये ॥
 प्रभु मैं रामानुज कर चेला । चरमारथ हित मोहिं इत मेला ॥
 चरमारथ करिये उपदेशा । तब गुरु दीन्हों ताहि निदेशा ॥
 विद्या कुल धन मद हत जेई । चरमारथ तुम को सो देई ॥
 गोष्ठी पूरणकी सुनिवानी । रंग नगर आयो मतिखानी ॥
 जाय तुरत रामानुज आलै । करि प्रणाम सब कह्यो हवालै ॥
 तेहि दिन पूर्णारजकी कन्या । अतुला नाम रही अतिधन्या ॥

दोहा—आइपितासों अस कह्यो, सलिल भरन हम जाहिं ॥

सासु न पठवति संगकोउ, हमहुँ अकेल डराहिं ॥३५॥
 पूरणार्थ कह सुनहु कुमारी । रामानुज ढिग जाहु सिधारी ॥
 कहियो सकल जो मनमें भावे । सोइ तुमरो सब शोक नशावै ॥
 अतुला रामानुज ढिग आई । सब हवाल निज गई सुनाई ॥
 यतिवर कह्यो दाशरथि काहीं । तुम गवनहु याके सँग माहीं ॥
 याको सकल सुधारहु काजा । दाशरथिहि गुनि मोद दराजा ॥
 अतुलासंग चल्यो अतुराई । करन लग्यो ताकी सेवकाई ॥
 पंडित येक रह्यो तेहि ग्रामा । सो किय श्रुतिको अर्थ निकामा ॥
 दाशरथिहिसुनि सहि नहिं गयऊ । शुद्ध अर्थ भाषत तहँ भयऊ ॥
 तब पंडित तापर अति कोप्यो । वाद विवाद तहाँ अति रोप्यो ॥
 दाशरथी पुनि अर्थ बखाना । जामें मिथ्यो विरोध महाना ॥
 सो सुनि सकल ग्रामके वासी । कियो प्रशंसा गुनि मतिरासी ॥
 पुनि सिंगरे अस वचन सुनायो । कौन काज हित तुम इत आयो ॥

दोहा—दास वृत्त कैसे करत, ह्वै पंडित मतिवान ।

दाशरथी तब अस कह्यो, गुरुशासन बलवान ॥३६॥
 तब सब दाशरथी पद वंदे । भूषण वसन दियो सानंदे ॥

कह्या क्षमहु हमरो अपराधा । दियो नाथ तुमको सब बाधा ॥
 अब हम पर करिकै अति दाया । जाहु भवन अपने द्विजराया ॥
 दाशरथी तव वचन सुनाये । हम गुरु शासनते इत आये ॥
 विन गुरुशासन हम नहिं जैहैं । ज्वाब कौन गुरुदेवहि देंहैं ॥
 तब अतुलायुत सब पुर केरे । जाय कहे रामानुज नेरे ॥
 यतिवर दाशरथी बोलवायो । ह्वै प्रसन्न चर्मार्थ सुनायो ॥
 पुनिवर रंगभवन पगु धारा । द्राविडार्थ सब पढ्यो उदारा ॥
 पुनि निज शिष्यन किय उपदेशा । आयवसे आपने निवेशा ॥
 यामुन शिष्य महा माति धामा । रह्यो जासु माला धर नामा ॥
 ताको अपने संग लेवाये । गोष्ठीपूर्ण रंगपुर आये ॥
 रामानुजसों वचन बखाना । पढहु सहस गीति व्याख्याना ॥

दाहा—मालाधर तुव गुरु अहैं, सहस गीतिके ज्ञात ।

सहस गीति इनसों पढो, सकल अर्थ अवदात ॥३७॥
 रामानुज सुनि गुरुकी वानी । पढ़न लगे अति आनंद मानी ॥
 एक समय रामानुज भाष्यो । अर्थ न यामुन यह कहिराष्यो ॥
 सुनि मालाधर भये उदासा । जात भये आपने अवासा ॥
 गाष्ठापूरण माला धरको । ल्याये फेरि यतीश्वर घरको ॥
 मालाधरको दियो बुझाई । रामानुजहि गुनो अहिराई ॥
 पढ्यो यथा सांदीपिनसों हरि । तथा पढ़ावहु तुमहि प्रीति करि ॥
 अर्थ यामुनाचारज केरे । जानतहैं यतिराज घनेरे ॥
 मालाधर तब लग्यो पढ़ावन । पुनि बोल्यो रामानुज पावन ॥
 यामुन अर्थ अहै यह नहिं । तब माला धर कह तहिं काहीं ॥
 लख्यो न तुम यामुन मति केतू । तासु अर्थ जानहु केहि हेतू ॥
 तब रामानुज कह मुसकाई । यामुन अर्थ गयो मोहिं आई ॥
 एकलव्य जिमि रह्यो निषादा । द्रोणहि मान्यो गुरु मर्यादा ॥

दोहा—कबहुँ लख्यो नहिं द्राणको, तेहि मूरति गृहराखि ॥

सकल शास्त्र विद्या पढ़ी, तिमि जानहु हरि साखि ॥३८॥

रामानुजके वचन सुनि, मालाधर मन माहिं ।

तासु प्रभाव विचारि मन, गुन्यो शेषतेहिं काहिं ॥३९॥

अपने सुतको शिष्य करायो । रामानुज पढाइ घर आयो ॥

एकसमय रामानुज स्वामी । ध्यावत रंगनाथ खगगामी ॥

यामुन सुत वर रंगहि नामा । कीन्हो गवन सुरत तेहि धामा ॥

मारग मास रह्यो तहि काला । राम बवाह उछाह विशाला ॥

तौन उछाह माहँ वर रंगा । राच्यो रुचिर रामके रंगा ॥

नृत्य करत रह रघुपति आगे । गावत मधुर सुपद अनुरागे ॥

ताहि देख रामानुज हरष्यो । बार बार नैननि जल वरष्यो ॥

करन लग्यो ताकी सेवकाई । रैन दिवस नम्रता दिखाई ॥

रामानुजकी लखि सेवकाई । सो वर रंग कह्यो सुनु भाई ॥

सेवन करहु मोर जेहि हेतू । सा अब कहहु प्रगट कुलकेतू ॥

तब रामानुज कह कर जोरी । चरम अर्थ पढने मति मोरी ॥

तब वररंग कृपा अति कीन्हो । रामानुजाह पढ़ाइ सा दांन्हा ॥

दोहा—परब्रह्म गुरुदेवहै, परधन गुरुहि विचार ।

परम काम गुरुहैं सदा, गुरुहैं परमअधार ॥ ४० ॥

परविद्या गुरु जानिय, परगति गुरुको मान ॥

उपदेशकजो जानको, गुरुते गुरु नहिं आन ॥ ४१ ॥

सकल उपाय उपेय जग, गुरुको लेहु विचारि ॥

यह उपाइ पंचम अहै, दियो वेद निर्धारि ॥ ४२ ॥

ऐसो जब वर रंग पढ़ायो । रामानुज अति आनँद पायो ॥

तब वररंग यतीश्वर काहीं । जान्यो शेष रूपमनमाहीं ॥

अपने अनुजहि सव्य करायो । रामानुज अपने घर आयो ॥

वस्यो रंगपुर सहित समाजा । कारक सकल जनन कर काजा ॥
 गोष्ठीपूरण कांची पूरण । शैलपूर्ण औरहु जो पूरण ॥
 अरु मालांधर सुमति निवेरे । पाव शिष्य ये यामुन केरे ॥
 पाँचहु रामानुजहि पढायो । निज निज पुत्रन शिष्य करायो ॥
 रंग नगर रामानुज भ्राजा । जैसे सुरन सहित सुरराजा ॥
 विन गुरु कृपा परमगति नाहीं । जानहु यही सत्य मनमाहीं ॥
 सब आचार्यनके मधिमाहीं । रामानुज मुनि सरिस सोहाहीं ॥
 गुह्यत्रय यतिवर निर्माना । जामें सर्व श्रेष्ठ भगवाना ॥
 हरि आराधन क्रम जेहिं माहीं । सकल शास्त्र सिद्धांत सोहाहीं ॥

दोहा—रंगनाथको विधि सहित, पूजन आठौ याम ॥

करवावन वैष्णवनसों, यतिवर लह्यो अराम ॥ ४३ ॥

कवित्तवनाक्षरी—जालिम जगत कलिकालहै कराल साचो
 धर्मको न ख्याल रहै ख्याल मुक्त मालमें ॥ रंगनाथ पूजकते
 माथ धुनि डारयो नाहिं लाग्यो कछु हाथ धन गाथ कौन्यो का-
 लमें ॥ पूजक प्रधान अनुमान कीन्हो मानस मे रामानुज प्राण
 हरौ खुशी यहि ख्यालमें ॥ द्विज भरमाया ताकी जायाको बुझा-
 या जाइ दशकोटिगुण देन गुरुको कुचालमें ॥ १ ॥

—रामानुज याति राज, साधारण परभातमें ॥

भिक्षा माँगन काज, तेहि द्विज भवन कियो गवन ॥ ४४ ॥
 सो द्विज निकट बोलि निज नारी । लहि इकांत अस गिरा उचारी ॥
 आयो भीखलेन यतिराई । देहु गरल मुखसरल सुनाई ॥
 सुनि पति वचन नारि दुखमानी । भिक्षा माहिं गरल कछु सानी ॥
 तौन अन्नलै बाहेर आई । दीन्हो यतिवर कर शिरनाई ॥
 तासु चरणमहँ तिय लखि दीन्ही । यह विष वलित भीखल्यो चीन्ही
 यतिवर जानि भीखलै लीन्हो । श्वानहि सो खवाइ प्रभु दीन्हो ॥

करि जलपान बहुरि घर आये । यह सुनि गुरु श्रीपूर्ण सिधाये ॥
 यतिवर लेन गये अगवानी । कावेरी तट मिले विज्ञानी ॥
 लखि गोष्ठीपूरण गुरु काहीं । परे दंड सम अवनी माहीं ॥
 गोष्ठीपूरण तेहि न उठायो । करन परिक्षा हित चित चायो ॥
 लागि रह्यो तहँ माधव मासा । रही तपित रज मनहुँ हुतासा ॥
 रामानुज तनु चलयो प्रसेदूँ । सो लखि भयो येक द्विजखेदू ॥
 दोहा—गोष्ठीपूरणसों कह्यो, शिष्यसो अति अकुलाइ ॥

क्यों न उठावहु मम गुरुहि, आरो मारन धाइ ॥४५॥
 गोष्ठीपूरण तुरत उठाई । रामानुजको कह्यो बुझाई ॥
 याके कर अब भोजन करहु । और विश्वास हिये नहिं धरहु ॥
 सिकता तापित तुमहि निहारी । लीन्हों तुमहि पीठि निज धारी ॥
 मोको कह्यो कुपित अति वानी । याकी मति तुवहित अति सानी ॥
 गोष्ठीपूरण शासन शिरधरि । रामानुज आयो पुनि घर फिरि ॥
 रंगभवन इक दिवस अकेले । गयो दरशहित कोउ नहिं भेले ॥
 पूजक चरणामृत विष घोरी । दीन्हो यतिवर कहँ द्रुत दोरी ॥
 विषहु जानि चरणामृत मानी । कियो पान यतिवर सुखआनी ॥
 सो विष अमृत भो तेहिं काला । तेहिं बचाइ लिय दीनदयाला ॥
 यहि विधि सिगरे पूजक पापी । रामानुज परसंतन तापी ॥
 बहु विधि मारण कियो प्रयोगू । पैसब वृथा भये उत योगू ॥
 यतिवर तिनहि कह्यो कछु नहिं । मान्यो जैसे रह्यो सदाहीं ॥

सोरठा—साधुनकी यह रीति, करहिं कबहुँ अपकारनहिं ॥

मानहिं सबसों प्रीति, शत्रुहि मित्र समान गुनि ॥४६॥
 गंगातट तीरथ पति प्रागा । जासु सुयश जग जाहिर जागा ॥
 तहँ इक यज्ञ मूर्ति अस नामा । भयो विप्र इक विद्या धामा ॥
 पढ़िबहु शास्त्र वाद बहु कीन्हो । पंडित सभा जीति सब लीन्हा ॥

सुन्यो श्रवणसों दक्षिण देशा । रामानुज पंडित इक वेशा ॥
 रामानुज जीतन चित चहिकै । गवन्यो दक्षिण देश उमहिकै ॥
 शत पंचाशत शकटन माहीं । भरे अनेकनि पुस्तक काहीं ॥
 लीन्हे संग शिष्य समुदाई । रंगनगर पहुँच्यो सो जाई ॥
 रंग नाथको दर्शन करिकै । रामानुजहि कह्यो तहँ अरिकै ॥
 पंडित सुनियत तुमहिं प्रवीना । ताते वादकरन मन कीना ॥
 होय हमार तुमार विवादा । होवै जीतनकी मर्यादा ॥
 तुमसों अजय मान हम होवैं । तुव पादिका शीश महुँढोवैं ॥
 हमसों जो जावहु तुमहारी । तौ मम शिष्यन होहु अचारी ॥

दोहा—यज्ञ मूर्तिके वचन अस, सुनि यतिराज सुजान ।

एवमस्तु कहि देतभे, माच्यो वाद महान ॥ ४७ ॥
 रंगनाथ मंदिर महुँ दोऊ । भयो विवाद लख्यो सब कोऊ ॥
 भयो सप्तदश दिवस विवादा । रही समान उक्ति मर्यादा ॥
 यज्ञमूर्ति सत्रहवैं द्योसा । प्रबल परचो अनेकदै दोसा ॥
 समाधान रामानुज केरे । परेशिथिल तेहि द्योसघनेरे ॥
 उठि यतिपति निजमंदिर आये । निज मन शोक समुद्रडुवाये ॥
 करि व्रत शयन कियोनिशिमाहीं । सुमिरचो बार बार प्रभु काहीं ॥
 रंगनाथसों कह्यो पुकारी । अब मर्यादा जाति तिहारी ॥
 तुमहीं यह मत थापित कीन्हो । तुमहीं अब खंडन मन दीन्हो ॥
 करन हतो जो ऐसहि नाथा । प्रथमहि दियो शीश कसहाथा ॥
 अस कहि यतिवर कीन्होशयना । रात स्वप्नमहुँ कह श्रीअयना ॥
 काल्हि विजय पैहौ यतिराई । जैहै यज्ञ मूर्ति शिरनाई ॥
 हरि निदेशसुनिअतिसुखमानी । जागि उच्यो यतिवर मति खानी ॥

दोहा—हरि हरि कहि उठि नाइ द्रुत, नित्य नेम निरधारि ।

रंगभवन आवत भयो, ध्यावत चरणखरारि ॥ ४८ ॥

यज्ञमूर्ति यतिपति कहँ जोह्यो । मानहुँ सिंह शैल अवरोह्यो ॥
 औरहु दिनते दुगुन प्रकासा । दूनो हर्ष दुगुन मुख हासा ॥
 यज्ञमूर्ति तब मनहिं विचारी । मोसों कीलिह गयो यहहारी ॥
 हर्षवान आवत अति आजू । कारण कौन कियो नहिं लाजू ॥
 यहै रंगनाथ परभाऊ । याके जीतन को न उपाऊ ॥
 रंगनाथकर रूपा । उद्धत सार्वभौम यति भूपा ॥
 यज्ञमूर्ति अस मनहिं विचारी । गह्यो तासु पद पाणि पसारी ॥
 बार २ करि दंड प्रणामा । बोल्यो वचन महामति धामा ॥
 तुमसों हम विवाद नहिं करिहैं । आप पादुका शिरमहँ धरिहैं ॥
 तब रामानुज वचन बखाना । क्यों नहिं करहु विवाद सुजाना ॥
 यज्ञमूर्ति तब कह कर जोरी । नहिं सामर्थ्य वादकी मोरी ॥
 जन जन सों जग होत विवादा । ईश जीवकी नहिं मर्यादा ॥

दोहा—रंगनाथके रूप तुम, हम लघु पंडित विप्र ।

मोहिं शिष्य अपनो करो, करि दाया प्रभु क्षिप्र ॥४९॥

यज्ञमूर्तिको तुरतहीं, शिष्य कियो यतिराज ।

रंगनगरमें वसत भो, सेवत सहित समाज ॥ ५० ॥

तजो जनेऊ जो प्रथम, ताको प्रायश्चित्त ।

करवायो यतिराज तेहि, विमल भयो तब चित ५१ ॥

संस्कारकरि पाँचहू, शीश शिखा रखवाइ ।

नामदेव मन्नाथ दिय, मतके ग्रंथ बढ़ाइ ॥ ५२ ॥

देवरायइक नाम अरु, द्वितिय देव मन्नाथ ।

यज्ञमूर्तिको देत भे, उभयनाम यति साथ ॥ ५३ ॥

तासु तेज विद्या बुधि देखी । रामानुज निज ते वर लेखी ॥

इक नवीन मठ बृहद बनायो । देवराज कहँ तहाँ टिकायो ॥

तहँ ऐश्वर्य बनाइ महाना । राख्यो बहु भागवत प्रधाना ॥

तहाँ चारि द्विज पंडित आये । यतिपति शरण होन चित चाये ॥
 यतिपति देवराज मुनि नेरे । पठवायो करवावन चरे ॥
 देवराज मुनि चारिहु काहीं । किये समाश्रति अति सुखमाहीं ॥
 कह्यो द्विजनसुं सुनहु पियारे । है यतिराज अधार हमारे ॥
 यह विभूति सब यदुपति केरी । धोखेहु विप्र न जानहु मेरी ॥
 गुरुके वचन विप्र सुनि चारी । धन्य धन्य अस गिरा उचारी ॥
 तहँ पश्चिमते वैष्णव आये । रंगनगर मधि ते मोहराये ॥
 कहँ मंदिर मन्नाथ सुमतिको । देहु बताइ हमहि यतिपतिको ॥
 पुरजन कह्यो रंगपुर माहीं । द्वैमन्नाथ भवन दरशाहीं ॥

दोहा—पुरजनके अस वचन सुनि, वैष्णव विस्मयमानि ।

कहत भये पुरजनन सों, परैन दूसरजानि ॥ ५४ ॥

इक यति पति मन्नाथ महाना । मम ईश्वर भागवत प्रधाना ॥
 अबलौं हम जान्यो इक काहीं । दूसरहै मन्नाथ कहाहीं ॥
 गुरुजन तब सब भेद बतायो । यतिपति जस मन्नाथ बनायो ॥
 देवराज मुनि सुन्यो हवालै । मोर नाम भ्रम होत कृपालै ॥
 अति दुख मानि गुरू ढिग आयो । बहुत विलखि अस विनय सुनायो ॥
 नाथ विभूति आपनी लेहू । तोहिं तजि रहौं न दूसर गेहू ॥
 भटकत भटकत यह संसारा । बहुत दिवस महँ भयो उधारा ॥
 तुम्हरे नाम होइ भ्रम मोरा । यह दुख मोहिं पिया पत घोरा ॥
 अस कहि सकल विभूति विहाई रहन लग्यो यतिपति गृह आई ॥
 रामानुज स्वामी अति हषै । तापर कृपा सलिल अति वर्षै ॥
 वरदराज पूजन अधिकारा । दीन्हो ताहि जानि अविकारा ॥
 देवराज मुनि किये द्वै ग्रंथा । जामें गुरुपद रतिकी पंथा ॥

दोहा—एक समय यति नाथ प्रभु, शिष्य पढावत माहिं ।

वचन कह्यो यहि भांतिते, देखि शिष्यगण काहिं ५५

व्यंकट नाथहि गो चित लाई । पूजे तुलसी फूल चढ़ाई ॥
 ताको फल अनंत विधि होवै । कोटि जन्मके पातक खोवै ॥
 तब अनंत इक शिष्य सुजाना । नाइ चरण शिर वचन बखाना ॥
 व्यंकटेश पूजन मोहिं देहू । मेरो तापर परम सनेहू ॥
 एवमस्तु स्वामी कहि दीन्हो । गवन सुव्यंकट गिरि कहँ कीन्हो ॥
 रच्यो विमल वृंदावन बागा । तुलसि पुहुपते पूजन लागा ॥
 निष्ठा तासु सुनत यति राजा । व्यंकट गिरि गवने कृत काजा ॥
 महित क्षेत्र तेहि मारग माहीं । देख्यो पद्मविलोचन काहीं ॥
 तिनलो वंदि धनद दिशि जाई । वसे देहलीपुर यतिराई ॥
 तहाँ त्रिविक्रम प्रभुको वंदे । चित्रकूटगे परम अनंदे ॥
 तहँ बहु विषम वाद करतारा । समय जानि नहिं तिनहिं सुधारा ॥
 अष्ट सहस्र गाउँ पुनि गयऊ । तहँ वै शिष्यनाथके रहेऊ ॥

दोहा—एक दरिद्री एक रह, धनि यतिपती समीप ।

पठवायो निज शिष्य द्वै, श्रीवैष्णव कुलदीप ॥५६॥
 धनमद विवश धनी अज्ञाना । कीन्हो नहिं वैष्णव सन्माना ॥
 गुरु सत्कार साजि सब साजा । वैष्णव फिरे जानि हत काजा ॥
 यतिपतिसों कह आइ दुखारी । धनी सुन्यो नहिं बात हमारी ॥
 सोतो धनमद अंध महाना । कीन्हो नहिं हमरो सन्माना ॥
 यद्यपि चह आपन सत्कारा । पै कीन्हो वैष्णव अपकारा ॥
 नहिं प्रसन्न भे यतिपतिताते । फिरत भये तापर अनपाते ॥
 चह्यो करन सत्कार हमारा । पै नसाधु सत्कार सुधारा ॥
 मोतैं अधिक अहैं मम दासा । तिन अपमान मान ममनासा ॥
 मुख न विलोकव ताकर ताते । जैहै जन्म जगति पछिताते ॥
 असविचारि रामानुज स्वामी । भये दरिद्री शिष्य गृहस्वामी ॥
 जौ न समय गुरु आगम भयऊ । रह्यो न सो भिक्षाटन गयऊ ॥

रही भवन महीं ताकर दारा । गुर आगम निज भवन निहारा ॥

दोहा—तनु भरि वसनहु नहिं रह्यो, लाज विवश सो नारि ॥

कठी न बाहिर भवन के, सकी न गुरुहि निहारि ॥५७॥

रामानुज तहैं शिष्य समेता । भवनद्वारगे कृपानिकेता ॥

तब तिय दियो हुंहुं करतारी । तब प्रभु तिय विन बसन विचारी

दीन्हों फेंकि शीश निज चीरा । सो तिय धारण कियो शरीरा ॥

स्वामीचरण गिरी कठि घरते । सादर चरण धोइ दुहुँ करते ॥

बहुरि सकल संतनपद धोयौ । धनि २ जगत जन्म निज जोयौ ॥

यतिपतिसों किय विनय बहोरी । रहहु आजु इत असरुचि मोरी

अहों दरिद्रिनाथ सब भांती । तुमहि देखि भै शीतल छाती ॥

जो कछु होइ अन्न घर मेरे । लगै नाथ आजुहित तोरे ॥

भोजन कराहिं इहां सब संता । भूरि भाग्य भेट्यो भगवंता ॥

असकहि भीतर भवन सिधारी । नहिं कछु वरमहँ अन्न निहारी ॥

लगी विचार करन द्विजदारा । केहि विधि करौं नाथ सत्कारा ॥

भूषण वसन अन्न धन नार्हीं । गेपति कहुँ भिक्षाटन काहीं ॥

दोहा—एकवणिक मम मिलनहित, देन कह्यो धनभूरि ॥

राखनहितपतिधर्ममें, दीन्हों आशातूरि ॥ ५८ ॥

भाषतहैं अस वेद पुराना । करै अवहु करि गुरु सन्माना ॥

तदपि न होइ धर्मकी हानी । सुमति अनेक यहू भल जानी ॥

ताते वनिक निकट चलि जाऊं । ताकी आश पूरि धन ल्याऊं ॥

गुरुकारजजो लगै शरीरा । सफल जन्म सोइ कह मतिधीरा ॥

अस विचारि तेहिं वनिक निकेतू । द्विजरवनी गवनी गुरुहेतू ॥

कह्यो वचन सुनु वणिक सुजाना । बहुदिन ते तैं रहे लोभाना ॥

मन भावत अपनो करि लीजै । गुरुहित आजु साजु सब दीजै ॥

शिष्यसहित रामानुज स्वामी । करैं न कछुक मोर बदनामी ॥

वणिक विचार कियो मनमार्हीं । गुरहित यहि तनुकी सुधि नाहीं ॥
धर्म हेतु त्यागति मर्यादा । गुरुदित कछु न भीति अपवादा ॥
धन्य धन्य युवती जग ऐसी । किय गुरुभक्ति वेद महँ जैसी ॥
अस गुणि उक्थो वणिक मतिवंता । नारि चरण महँ परचो तुरंता ॥

दोहा—गौरीसम जगवंदनी, नारि शिरोमणि आप ॥

पतिव्रतानि समाजमें, सत्य रावरी थाप ॥ ५९ ॥

जाउ भवन भगवतकी प्यारी । मैं गुरसेवन साजु सँवारी ॥
ऐहाँ तेरे भवन तुरंता । करिहाँ दरश गुरू भगवंता ॥
अस कहि वणिक साजु बहु भांती । पठवायो तिय सँग सुख माती ॥
रचि भोजन बहुविधि निजहाथै । भोजन करवायो निजनाथै ॥
कीन्हों जेहि विधि गुरु सत्कारा । सब संतनको तेहि परकारा ॥
विप्रप्रियाकी पेषत प्रीती । गुन्यो गुरू लिय सेवा जीती ॥
करि भोजन गुरु बैठे जबहीं । आयो नारि कंतगृह तबहीं ॥
यतिपति पदसों कियो प्रणामा । तारि काम सुनि भो कृतकामा ॥
पतिसों तिय सब कह्यो हवाला । जेहि विधि भोजन दियो विशाला ॥
परम प्रसन्न भयो पतिताको । मान्यो फल गुरुदेव कृपाको ॥
पतिसों तिय निज कपट दुराई । लैइकांत वृत्तांत सुनाई ॥
तियको पति कछु गन्यो न दोषू । वाम धर्मकी धाम अदोषू ॥

दोहा—दंपति गुरुपद वंदि पुनि, दियो प्रदक्षिण चारि ॥

जोरि पाणि स्तुति करत, नयन बहावत वारि ॥ ६० ॥

गुरु आशिषदै शिष्यको, हर्षित हिये लगाय ॥

बारहिंबार सराहिकै, वसत भये सुखपाय ॥ ६१ ॥

तब प्रमुदित नारी पुनि आई । गुरुपद धोइ सलिल लैधाई ॥
गुरुको जूठहु अन्नहु लीन्हो । जाइ तुरतसों वैश्यहि दीन्हो ॥
कह्यो वचन यह गुरुपरसादू । शिर धरि खाहु सहित अहलादू ॥

शिर धारि किय चरणोदक पाना । गुरुजूठनखायो पकवाना ॥
 ताक्षण भई विमल ममताकी । परचो चरण तियके सुखछाकी ॥
 जोरि पाणि बोल्यो अस बाता । तैं मम गुरु ईश्वर पितु माता ॥
 क्षमहु मोर अपराध महाना । मैं कछु तव प्रभाव नहिं जाना ॥
 लै चलु अपने संग लेवाई । गुरुशरणागत वेगि कराई ॥
 तब ताको तिय करगहि ल्याई । स्वामी शरणागत करवाई ॥
 छूटे कोटि जन्मके पापा । करन लग्यो अष्टाक्षर जापा ॥
 तापर ह्वै प्रसन्न यतिराई । लियो जो संपत्ति वैश्य चढ़ाई ॥
 उपजो वैश्यहि विमल विरागा । तजि धन धाम राम अनुरागा ॥

दोहा—विप्र विप्र तिय अरु वणिक, रामानुजकेसंग ॥

वसुधामें विचरन लगे, रँगै राम रतिरंग ॥ ६२ ॥

धनिक शिष्य जो यतिवर केरो । करिऽपमान जो संतन फेरो ॥
 सुन्यो सो गुरुपुर आगम जबहीं।गिरचो आइ यतिपतिपद तबहीं
 विनय कियो नम्रित कर जोरी । करहु पवित्रकुटी प्रभु मोरी ॥
 तब रामानुज तेहिं अस भाष्यो । साधु सेवतैं नहिं अभिलाष्यौ ॥
 नहिं यहि भांति संतकी रीती । तैं त्याग्यो जिय ते यम भीती ॥
 मुख्य धर्म यह चारि प्रकारा । तामें प्रथम संत सत्कारा ॥
 गुरुविश्वास राम अनुरागू । जगकर विषय भोग सब त्यागू ॥
 सब कर साधु सेवहैं मूला । तामें प्रथम भये प्रतिकूला ॥
 जवै संत घर पाहुन आवै । चरण धोइ तेहिं विजन चलावै ॥
 भोजन दै पुनि प्रभु सम पूजी । मंगल तासु उपाइ न दूजी ॥
 हालै तब आलै नहिं जैहैं । तब पखंड केहिभांति छिपैहैं ॥
 कालांतर महँ पुनि तुम ऐहौं । सेइ संत तब घरलै जैहौं ॥

दोहा—बहुत भांति सों किय विनय, पै न गये यतिराज ॥

क्षेत्र सत्य व्रत गवन किय, लै निज संत समाज ॥ ६३ ॥

तहँ रह कांचीपूरण स्वामी । मिले तिनहिं गुणि जगत अकामी ॥
 वरदराजको दरशन लीन्हो । वासित रात्र संत सँग कीन्हो ॥
 पुनि कीन्हो व्यंकट गिरि गवना । तहँ रह कपिलतीर्थ अवदवना ॥
 दश योगी तहँ वसे सदाहीं । कछु दिन वसे यतीश तहांही ॥
 तहँ इक विठ्ठल देव भुवाला । प्रभु सेवन आयो तेहिं काला ॥
 लखि अनूप यतिराज प्रभाऊ । भयो शिष्य भरि भूरि उराऊ ॥
 गुरुहि समप्यो सो धनभूरी । भैतेहिते यमकी भय दूरी ॥
 पुनि तुँडीर मंडल इक देशा । तहँ विलमंगल ग्राम सुवेशा ॥
 गवन कीय तहँ यति गण कंता । सुनि आये तहँके सब संता ॥
 विनय कीन्ह प्रभु गिरिपर चलहू । हरिहि दरशि जन दुखदल दलहू ॥
 प्रभु कहं वसैं सुसंत इहाँहीं । हम किमि शैल शीशपर जाहीं ॥
 करै अचारज सो सिखि गहई । शेष रूप यह भूधर अहई ॥

दोहा—संत कहे कर जोरिकै, जो तुम जैहौ नाहिं ॥

तौ किमि कोई जायगो, होई धर्म वृथाहि ॥ ६४ ॥

दीन वचन सुनि संतन केरे । नाथ शैलचढ़िबो चितहेरे ॥
 व्यंकट नाथ चरण धरि माथा । चढे शैलपर साधुन साथ ॥
 बीचहि शैलपूर्ण गुरु आये । दै प्रसाद गुरु को सुख छाये ॥
 यतिपति किय तेहिं दंड प्रणामा । कह्यो नाथ आये केहिकामा ॥
 जो प्रसाद शिशुकर पठावते । तबहूँ हम अति मोद पावते ॥
 गुरु कह बालक रहे न कोई । आयो मही प्रीति तव जोई ॥
 शैल पूर्ण लै यतिपति काहीं । गवन किये हरि मंदिर माहीं ॥
 तहँके तीरथ सकल नहाई । तीनि दिवस विन अशन विताई ॥
 उतरि शैलसे संत समेतू । शैल पूर्णके गये निकेतू ॥
 कीन्हो तहाँ वर्ष दिन वासा । शैल पूर्ण सँग सहित हुलासा ॥
 शैलपूर्णकी करि सेवकाई । रामायणहि पढ़्यो यतिराई ॥

तहँ गोविंदाचार्य सुजाना । एक दिवस करि प्रेम महाना ॥

दोहा—यतिपति सोवन सेज रचि, आप रहे तेहिं सोइ ।

रामानुज गोविंद सों, बोले अनुचित जोइ ॥ ६५ ॥

गुरुहितसेज विरचि तुम सोये । शास्त्ररीति कस कबहुँ न जोये ॥
तब गोविंद कह्यो कर जोरी । सेज परीक्षा इत किय खोरी ॥
वरुक नरक दुख लहौं अभागै । पै नहिं तुव तनु कंटक लागै ॥
सुनि गोविंद वचन यतिराई । प्रीति पेखि उर लियो लगाई ॥
एक समय यतिपति गोविंदा । गये विपिन विहरन सानंदा ॥
तहँ मुख कंटक वेधित व्याला । लखि गोविंद दयालु विहाला ॥
भय तजि अहि मुख अंगुलि डारी । कंटक लियो तुरंत निकारी ॥
पुनि मज्जन करि यतिपति नेरे । आवत भे तब यतिपति टेरे ॥
बिलमें कह गोविंद यहि काला । तब गोविंद कह व्यालहवाला ॥
शैल पूर्ण ढिग पुनि दोउ आये । रंगनगर हित विदा कराये ॥
शैल पूर्ण कह कहा त्वहि देहू । सकल लगत लघु निरखि सनेहू ॥
यतिपति कह मानहु जो सेवा । देहु गोविंदहि तो गुरुदेवा ॥

दोहा—शैलपूर्ण कर करि कुशा, लै जल पढि संकल्प ।

यतिपतिको गोविंद दिय, करिकै प्रेम अनल्प ॥ ६६ ॥

तब गोविंद और यतिराजू । गवने कांची सहित समाजू ॥
घटिकाचल नृसिंह अभिरामा । गृध्र तड़ाग तीर सिय रामा ॥
दर्शन करत पंथ यहि भांती । आये कांची सहित जमाती ॥
वरदराजको दर्शन कीन्हो । गुरुगृह पदै गोविंदहि दीन्हो ॥
शैल पूर्ण ढिग गोविंद आये । खान पान सन्मान न पाये ॥
शैल पूर्ण तिय तब अस कहेऊ । किमि गोविंद सत्कार न लहेऊ ॥
शैल पूर्ण तब गिरा उचारी । उचित न ग्रहन वस्तु दैडारी ॥
सुनि गोविंद गुरु वचन तुरंता । कांची चलयो जहाँ यतिकंता ॥

यतिपतिसों सब कह्यो हवाला । सो सुनि मान्यो मोद विशाला ॥
रंगनगर आये यतिराजा । लै सँग गोविंद संत समाजा ॥
तेहि वैष्णव आगू चलि लीन्हे । रंग भवैनको गवनाहि कीन्हे ॥
रंगनाथको माथ नवाई । पाइ प्रसाद महामुद छाई ॥

दोहा—करि स्तुति कर जोरि कै, आये पुनि निज धाम ।

रामायण चिंतन लगे, यतिपति पूरण काम ॥ ६७ ॥
एक समय यतिपति मृह माहीं । श्रीगोविंदाचारज काहीं ॥
वैष्णव सकल प्रशंसन लागे । धरि गोविंद गुरुपद अनुरागे ॥
अपनी सुनी प्रशंसा जबहीं । गोविंद अति प्रसन्न भो तबहीं ॥
तब रामानुज वचन उचारे । कस स्तुति सुनि भये सुखारे ॥
अपनी स्तुति सुनि मतिवाना । कोउ प्रसन्न कबहुँ नहि आना ॥
तब गोविंद कही अस वानी । निजसम धन्य नमैं प्रभु जानी ॥
भ्रमत रह्यो योनिहिं चौरासी । लही कृपा तब आनंद रासी ॥
ताते मो सम नाथ न कोई । अस तो मोहिं परत है जोई ॥
गोविंद गिरा सुनत यतिराई । तेहिं सराहि उर लियो लगाई ॥
एक समय गोविंद विज्ञानी । गये रंग मंदिर छवि खानी ॥
तासुद्वार यतिपति यश गावत । रही एक गणिका छविछावत ॥
सुनन लगे भो विलम बडोई । यतिपतिसों कह वैष्णव कोई ॥

दोहा—नाथ सुनत गोविंद उत, इक गणिकाको गान ।

रामानुज गोविंदको, कियो तुरत आह्वान ॥ ६८ ॥
गुरु कह्यो जब गोविंद आये । गणिका गान कहा चित लाये ॥
गोविंद कह गुरु सुयश तिहारा । गावत रही लग्यो मोहिं प्यारा ॥
हे गुरु तब कीरति कोउ गावै । सो मेरो चित फाँसि फँसावै ॥
यतिपति गुनि गुरु भक्ति दृढ़ाई । गोविंदहि दिय भूरि बड़ाई ॥
एक समय गोविंद की माता । गोविंद सों बोली अस बाता ॥

जाहु घरै ऋतुवन्तिनि नारी । मातु वचन सुनि भये दुखारी ॥
 गुरुसेवाते नहिं अवकासा । नहिं सुधि मोहिं कहँ तिय कहँ वासा ॥
 तब गोविंद जननी यतिराजै । कियो निवेदित सिंगरो काजै ॥
 यतिपति हूं गोविंद पठायो । बार बार अस वचन सुनायो ॥
 करहु गृहस्थ धर्म जब ताई । तब लगि चलु गृहस्थकीनाई ॥
 हम अस सुन्यो जबै घर जाहू । ज्ञान विराग तिये बतराहू ॥
 जो न गृहस्थ धर्म मन होई । ग्रहण करो त्रिदंड विधि जोई ॥
 दोहा—तब गोविंद कर जोरि कै, मोहिं देहु संन्यास ।

विन दीन्हे संन्यासके, नहिं छूटी यम पास ॥ ६९ ॥
 तब रामानुज विरति बिलासी । कीन्हो गोविंदको संन्यासी ॥
 लागे दैन नाम मन्नाथा । कह गोविंद जोरि युग हाथा ॥
 मोहि मन्नाम नाम नहिं योगू । कहत नाम तिहरो यह लोगू ॥
 तब तेहिं नाम दियो जंवारा । गोविंद पायो मोद अपारा ॥
 आनंद सहित बित्यो कछु काला । किय विचार यतिराज कृपाला ॥
 जामुन अंत समय हम आये । भाष्य करनको प्रणमुख गाये ॥
 ताते भाष्य करहुँ यहि काला । ज्ञान भक्ति वैराग्य विशाला ॥
 नहिं इतहैं बोधायन ग्रंथा । कैसे कै प्रगटी सतपंथा ॥
 अस विचारि सँग लै कूरेशै । गये शारदापीठि सुदेशै ॥
 तहँ के लियो पंडितन जीती । कियो शारदा प्रभुपै प्रीती ॥
 लै बोधाइन ग्रंथ मुनीशा । चलत भये सुमिरत जगदीशा ॥
 तहँके पंडित सब अकुलाने । विन बोधायन ग्रंथ सुजाने ॥

दोहा—चले चारि पंडित तुरत, आये यतिपति पास ।

सो बोधायन ग्रंथको, लिय छड़ाय अनयास ॥ ७० ॥
 जब पुस्तकलै गये छँड़ाई । रामानुज दुख लह्यो महाई ॥
 तब कूरेश कही अस वानी । स्वामी मति मनकरहुगलानी ॥

एकवारमैं सब अवलोका । है गो कंठ करहु नहिं शोका ॥
 अस कहि तहैं कूरेश सुजाना । सो बोधायन ग्रंथ महाना ॥
 रह्यो लक्ष श्लोक प्रमाना । ताको कंठकियो सब गाना ॥
 रामानुज अचरज मन माना । रंगनगरको कियो पयाना ॥
 आइ रंगपुर भवनसिधारा । रचन हेतु श्रीभाष्यविचारा ॥
 तब यतिपति कूरेश बोलायो । तेहिं कर भाष्य प्रबंध लिखायो
 रचि यतिपति श्रीभाष्य सुहाई । दिय वेदांत प्रदीप बनाई ॥
 पुनि वेदार्थ संग्रह निर्माना । पुनि वेदांतसार किय गाना ॥
 गीता भाष्य रच्यो सुखदाई । ये ते ग्रंथ रच्यो यतिराई ॥
 श्रीसंप्रदा प्रसिद्ध सुग्रंथा । ताते जानि परत सतपंथा ॥

दोहा—एक समय वैष्णव सकल, यतिपतिके ढिगआइ ।

विनय कियो प्रभु अवनि मे, करी दिग्विजय जाइ ७१
 रामानुज संमत कर दीन्हो । सुघरी साधि गवन प्रभु कीन्हो ॥
 सादर रंगनाथपद ध्याई । चौलदेश आये यतिराई ॥
 तहैं करि विजय विष्णुमत थापी । पांडुदेस आये हरि जापी ॥
 तहाँ जीति कुरका पुर आये । तहैं दश ग्रंथ पढे सुख छाये ॥
 तहैं शठकोपस्वामि कर मंदिर । गवन कियो तहैं यति कुल चंदिर
 यतिपुंगव करि ग्रहण प्रसादा । यह श्लोक कियो तहैं वादा ॥

श्लोक—बकुल धवल माला वक्षसंवेदबाह्य प्रबल समय वाद
 च्छेदनं पूजनीयम् ॥ विपुलकुरुकनाथं कारिसूनुं कवीशं शरण
 मुपगतोहंचक्रहस्तेभवक्रम् ॥ १ ॥

गये कुरंगनगर यतिनाथा । द्वादशसहस संतलै साथी ॥
 संग जासु चौहत्तर पीठा । वादयुद्धजे दिये न पीठा ॥
 पुनि रामानुज संतन संगी । आये सादर नगर कुरंगा ॥
 तहैं कुरंगपूरण भगवाना । तिनको दरश कियो सविधाना ॥

जब मंदिरमहँ गये यतीशा । प्रगट कइयो तहँते जगदीशा ॥
इतके लोग मोहिं नहिंमानै । विविध भांतिके नाम बखानै ॥

दोहा—सबको तुम शासन करहु, प्रगटहु मोर प्रभाव ॥

अनाचार करते महा, सो भेटहु यतिराव ॥ ७२ ॥

अपने शिष्य करहु मोहिं काहीं । बैठि कनक सिंहासन माहीं ॥
अस कहि उतरि सिंहासनते हरि । बैठायो रामानुज करधरि ॥
शीश नवाई वदन ठिग लाये । हरि कहँ यतिपति मंत्र सुनाये
पांचहु संस्कार प्रभु केरो । यतिपति किय जस वेदनिवेशो ॥
यह आचार्य देखि सब लोगा । सत्य सत्य कह भक्ति प्रयोगा ॥
रामानुजके शिष हरि भयऊ । यह यश त्रिभुवनमहँ भरिगयऊ ॥
रामानुजको रथहि चढ़ाई । विदा कियो हरि शीश नवाई ॥
रामानुज किय दंडप्रणामा । मम अपराध क्षमहु गुणधामा ॥
तौन देशवासी जन सिंगरे । जे हरिविमुख रहे मति विमरे ॥
ते प्रभुपद पूरी किय प्रीती । कीन्हों वैष्णव शास्त्रप्रतीती ॥
रामानुज गे केरलदेशा । लख्यो अनंत सैन कमलेशा ॥
रामानुज नामक इक मंदिर । रचि नास्तिकन जीति यतिचंदिर
दोहा—पश्चिम सागर तटहि तट, द्वारावती सिधारि ॥

तहँ यदुपतिको दरश करि, गे मधुपुरी पधारि ॥ ७३ ॥

मथुराते वृंदावन आये । पुनि बदरीवनकाहँ सिधाये ॥
बदरीवनते अवध पधारे । मुक्तिनाथको फेरि सिधारे ॥
औरहु नैमिष पुष्कर आदी । सकल तीर्थ कीन्हे अहलादी ॥
तहँ तहँ जे नास्तिक मतवारे । तिनहिं जीति निजपंथ पसारो ॥
पुनि शारदपाठि महँ आई । जहँ ज्वाला देवी सुखदाई ॥
गे दर्शन हित मंदिर माहीं । देवी भई प्रत्यक्ष तहाँहीं ॥
पूछ्यो श्रुतिको अर्थ भवानी । यतिपतिके सब अर्थ बखानी ॥

सुनि चंडिका लह्यो सुखधामा । भाष्यकार दीन्हो असनामा ॥
यतिपति कह केहि कारणमाता । भाषसि मोर सुयश अव दाता ॥
कह्यो अंबिका पंडित केते । अस न कह्यो आये इत येते ॥
तहँ पंडित बहु किये विवादा । पायपराजय लहे विषादा ॥
तहँको भूप शिष्य ह्वै गयऊ । यतिपति शेषरूप गनि लयऊ ॥

दोहा—यतिपति पर पंडित कुमति, किय मारन अभिचार ।

ते वैकल वागन लगे, विष्टा करत अहार ॥ ७४ ॥

पुनि राजासों ह्वै विदा, वैकल बुधन सुधारि ।

गंगातट आवत भये, रामानुज यशकारि ॥ ७५ ॥

पुनी काशी आये यतिराई । तहँ निजकीरति चहुँकित छाई
पुनि पुर खोजत प्येव सिधारे । लखि नीलाचल भये सुखारे ॥
करि जगदीश दर्श कछु काला । बसत भये तहँ पुरी कृपाला ॥
मठ विरच्यो रामानुज नामा । अब लौहै प्रसिद्ध सो धामा ॥
कछुदिन प्रभु तहँ कियो निवासा । वितरन वैष्णव वृंदहुलासा ॥
देख्यो तहँकी पूजन रीती । जान्यो सकल वेद विपरीती ॥
तब पूजकन बोलि यतिराई । साधुनमध्य कह्यो समुझाई ॥
जौन भांति पूजन तुम करते । सो सब वेदविमुख नहिं डरते ॥
भोग लगावहु जो सब अटका । वेदविमुख लखि होत सो खटका
कौने ग्रंथन को मत करहू । सो समझाय मोर मन भरहू ॥
जौन वेद सम्मत जग माहीं । सो सब निष्फल होत सदाहीं ॥
पूजक सकल जोरि युग पानी । यतिपति सों अस विनय बखानी

दोहा—जौन रीति प्रभु सर्वदा, चलि आई यहि देश ॥

तौन रीति पूजन करैं, भोग लगाय हमेश ॥ ७६ ॥

यद्यपि जानहिं वेद विधाना । पैयत है प्रभु यही प्रमाना ॥
नहिं कबहुं शास्यो जगदीशा । नहिं हमको दूसर मत दीसा ॥

यतिपति सुनि पंडन की बानी । बोले कुपित अनै अनुमानी ॥
 वेद विमुख हरि को उपचारा । करत होत शिर पातक भारा ॥
 मोरे लखत वेद विंपरीती । तुम करिहौ तौ पैहौ भीती ॥
 द्वादश सहस शिष्य हैं मेरे । पूजव हमहि रहव प्रभु नेरे ॥
 तुम सबको हम देव निकारी । वेद विरुद्ध विधान विचारी ॥
 पंचरात्र विधि पूजन करहु । की निज शिविर अनत कहँ धरहु ॥
 अस कहि यतिपति शिष्य बोलाये । जगन्नाथ मंदिर महँ आये ॥
 सिंगरे पंडन तुरत बोलाई । पंचरात्र विधि दियो सुनाई ॥
 बहुरि कह्यो कीजे यहरीती । नातौ पावहुगे अति भीती ॥
 पंडा यतिपति सीख न माने । मौन सदन गे शोकहि साने ॥
 दोहा—भये भोर पंडा सबै कीन्हे सोइ विधान ॥

यतिपति शिष्यनबोल तब, शासन दियो प्रमान ॥ ७७ ॥
 मंदिर ते सब पंडन काहीं । देहु निकारि रहै क्षण नाहीं ॥
 द्वादश सहस शिष्य सब धाये । पंडन मंदिर बाहिर लाये ॥
 रामानुज के शिष्य उदंडा । मंदिर ते काढे सब पंडा ॥
 रोवत पंडा सकल दुखारी । गये आपने भवन सिधारी ॥
 तब यतिपति मंदिर पगुधारा । सहित शिष्य वसु वेद हजार ॥
 पाठि पाठि वेदमंत्र सविधाना । मंदिर मार्जन कियो प्रमाना ॥
 वेद विधान कियो पुनि होमा । करी प्रतिष्ठा यज्ञ ससोमा ॥
 वेद विहित षोडश उपचारा । कीन्ह्यो पूजन चारिहु वारा ॥
 द्वारन द्वारन वैष्णवन थापा । ते कीन्हे अष्टाक्षर जापा ॥
 बीति गयो इक दिन यहि भांती । कियो शयन मंदिर तेहि राती ॥
 यतिपति को जगदीश निशामें । दीन्ह्यो स्वप्न पाछिलै यामें ॥
 दोहा—यतिपति तुम कीन्ह्यो यदपि, सुंदर वेद विधान ॥
 तदपि मोरि इच्छा प्रबल, यह थल सोइ प्रमान ॥ ७८ ॥

ताते शासन मानिय मोरा । रहन देहु सोइ विधि यहि ठोरा ॥
 गयो मोहिं लंघन परि आजू । लग्यो भोग नहिं यति शिरताजू ॥
 यहि विधि स्वप्न दियो भगवाना ॥ जागे यतिपति भयो विहाना ॥
 प्रभु सन्मुख यातिनायक जाई । करी विविध विधि स्तुति गाई ॥
 पुनि सोइ वासर वेद विधाना । किय पूजन यतियूह प्रधाना ॥
 पंडा सब जुरिकै तहँ आये । प्रभुको आरत वचन सुनाये ॥
 बैठे द्वार धरन सब ठाना । यतिपति कियो वचन नहिं काना ॥
 बीत्यो यहि विधि वासर सोऊ । पंडन दिनय सुन्यो नहिं कोऊ ॥
 राति स्वप्न दीन्ह्यो जगदीशा । मोरि विनय मानिये यतीशा ॥
 गंगा दक्षिण दिशि जे देशा । तिन महुँ तुव अधिकार हमेशा ॥
 यह थल मेरे अहै अधीना । लखहु न तुम इत विधि रहीना ॥
 जागे जब प्रभात यतिराई । जगन्नाथपर गे अनखाई ॥
 पंडनहूँ को दिय प्रभु सपना । तुम अधिकार पाइहौ अपना ॥

दोहा—प्रभुको शासन सुनत सब, गये सदन सुखमानि ॥

इत यतीश जगदीश ढिग, कहत भये अस वानि ॥ ७९ ॥
 तुमहीं कियो वेद कर वादा । अब तुमही मेटहु मर्यादा ॥
 ताते प्रथम वचन हम मानै । यह शासनहि मृषा अनुमानै ॥
 वदहु मोहवश पंडन केरे । जे श्रुति शास्त्र विधानहि फेरे ॥
 हमहिं दियो अपनो अधिकारा । तब नहिं यह कस कियो विचारा ॥
 तुमहिं कह्यो श्रुति शास्त्र न माहीं । जहँ विक्षिप्त भूप ह्वै चाहिँ ॥
 तहां सचिव सब लेहि सुधारी । भूपहि विजन भवन महुँ डारी ॥
 ताते नहिं मानव तुव भाखा । करब सो जो प्रथमहि कहि राखा ॥
 अस कहि पूजन वेद विधाना । करवायो यति वंश प्रधाना ॥
 वेद विहित विधि भोग लगायो । महाप्रसाद जनन बटवायो ॥
 सोउ दिन बीति गयो यहि रीती । तब जगदीश मानि अति भीती ॥

दीनदयालु भक्त आधीना । यतिपति काहिं स्वप्न पुनि दीना ॥
आज हमहिं भे तीनि उपासा । कहि न सकैं कछु तुम्हरे त्रासा ॥
दोहा—स्वप्नहिं भे यतिनाथ हू, नहिं मानी प्रभु वानि ।

तब जगदीश विचार किय, भक्त प्रबल अनुमानि ८० ॥
जबलों इत रहिहैं यतिराजा । तबलों करिहैं ऐसेहि काजा ॥
सेवा करि लीन्ह्यो मोहिं जीती । यापर मोरि परमहै प्रीती ॥
ताते यहि अनतै पठवाऊं । पुनि प्रथमहि की रीति चलाऊं ॥
अस विचारि प्रभु गरुड़ बोलायो । सो निशि माहिं नाथ ढिग आयो
कह्यो वचन गरुड़हिं जगदीशा । तुम उड़ाय लै जाहु यतीशा ॥
कूरमक्षेत्र देहु पहुँचाई । कानहु कान न परै जनाई ॥
तब तेहि निशि सोवत खगराई । शिष्य समेतहि पच्छ चढ़ाई ॥
कूरमक्षेत्र दियो पहुँचाई । नहिं जागे नहिं परचो जनाई ॥
भोर भये जागे यतिराई । चहुँदिशि लखत भये चौआई ॥
नहिं वह देश न मंदिर सोई । चकित भये जागत सब कोई ॥
जगन्नाथ नगरी महँ सोये । जागे कूर्मक्षेत्र कहँ जोये ॥
यतिपति सों पूछे भ्रम छाये । केहि विधि नाथ इतै सब आये ॥

दोहा—तब विचारि यतिपति कह्यो, प्रभु इच्छा यहि भांति ।
पठवायो जगदीश इत, शिष्य सहित यहि राति ८१ ॥
करै न करै अन्यथा करई । अस समर्थ को गुण श्रुति कहई ॥
नीलाचल महँ मम प्रभु केरी । यहि विधि इच्छा अहै तमेरी ॥
ताते करहि जो कछु मन भावै । अब नहिं हम नीलाचल जावै ॥
अस कहि कूर्म समीप सिधारे । तहँ शिवलिङ्ग अकारन हारे ॥
तहँ के सकल देश के वासी । कच्छप कहँ मानैं कैलासी ॥
तिनके वचन सुने यतिराई । कियो वास कछु अन नखाई ॥
स्वप्न दियो कूरम भगवाना । इतके सकल मनुज अज्ञाना ॥

पूजैं मोहिं शिवलिङ्ग विचारी । गुनैं न कमठरूप अविचारी ॥
ताते मोहिं प्रगटौ यहि ठोरा । मंदिरढिग सित चंदन मोरा ॥
भोर जागि यतिनाथ तहाँहीं । लियो खोदिसित चंदन काहीं ॥
वैष्णव दिये तिलक शिरभाला । थप्यो कूर्म यतिराज कृपाला ॥

दोहा—तवते कूर्म सरूप तहँ, प्रगट भयो जगमाहिं ॥

तेहि प्रसाद अहादभरि, भोजन कियो तहाँहिं ॥ ८२ ॥
तहाँ वसे कछु काल यतीशा । इत नीलाचल महँ जगदीशा ॥
पंडन बोलि भोग लगवायो । प्रथमकेर निज पंथ चलायो ॥
उत जन कमठक्षेत्र के वासी । स्वामी शिष्य भये गति आसी ॥
कमठक्षेत्र करि यहि विधि वासा । सिंहाचल आयो सहुलासा ॥
पुनि यतिपति गे गरुड़ गिरीशै । तहां नाथ नरहरि कहँ शीशै ॥
गये बेंकटाचल यतिराई । तहँ कौतुक लखि परचो महारई ॥
जोरि जमाति शैव सब आये । सकल वैष्णवन वचन सुनाये ॥
स्वामिकार्तिक की यह मूरति । वृथा विष्णु की कहहु मंदमति ॥
शङ्ख चक्र नहिं बाहुन माहीं । ताते विष्णुरूप है नाहीं ॥
वैष्णव कहैं विष्णु को रूपा । शैव कहैं स्कंद अनूपा ॥
वैष्णव शैवन भै अति रारी । तेहि अवसर यतिपति पगुधारी ॥
कह्यो शैव वैष्णवन बोलाई । हम झगरो सब देत मिटाई ॥

दोहा—आयुधहै स्कंद के, डमरू शूलहु आदि ॥

आयुधहैं श्रीविष्णुके, शारंग चक्र गदादि ॥ ८३ ॥
दोनहुँ के आयुध लै आई । यह वपु आगे देहु धराई ॥
जो आयुध धृतप्रात देखाहीं । सोइ रूप मानहु यहि काहीं ॥
यतिपति जब अस वचन बखाना । शैवहु वैष्णव मानि प्रमाना ॥
दोनहुँके आयुध धरि आगे । दै कपाट निशिमहँ सब भागे ॥
जाय प्रभात कपाट उचारी । देख्यो शङ्ख चक्र कर धारी ॥

माने सकल विष्णुको रूपा । जब वेंकट ध्वनि भई अनूपा ॥
 शैव निराश गये निज ऐना । यतिनायक मान्यो मन चैना ॥
 सुवर्ण मूरति रमा बनाई । अरप्यो वेंकटनाथहि जाई ॥
 तबते ससुर भये हरिकेरे । कियो विवाह विधान घनेरे ॥
 राखितहाँ प्रभु द्वै संन्यासी । गये सत्यव्रत क्षेत्र हुलासी ॥
 दक्षिण मथुरा कहँगे चाये । नगर वीरनारायण आये ॥
 पुनि बहुरूप नवावत शीशा । रंगनगर आये यतिईशा ॥

दोहा—रंगनाथ के चरणको, करि वंदन यतिराज ॥

आय सदन महँ वसत भे, शिष्य सहित कृत काज ॥८४॥
 रह्यो जौन कूरेश सुजाना । सो पश्चिम दिशि कियो पयाना ॥
 कांची पश्चिम दिशि इक कोसा । बस्यो तहाँ करि राम भरोसा ॥
 धन अरु अन्न अमित घर बाढ़ा । दियो दान जल यथा अषाढ़ा ॥
 दीनन देत भयो अतिशोरा । सुनि निशि भयो रमाको शोरा ॥
 कही प्रभुहि कमला कर जोरी । यह ख सुनत डरी मति मोरी ॥
 होत शोर कहँ देहु बताई । तब कूरेश कीरति हरिगाई ॥
 रमा कह्यो तेहिं इताहि बोलावहु । मेरे दृगगोचर करवावहु ॥
 तब कांचीपूरण कह नाथा । कह्यो स्वप्न महँ लयावहु साथा ॥
 कांचीपूरण कुरपुर जाई । हरि शासन सब गये सुनाई ॥
 सुनि कूरेश नाथ को शासन । मान्यो सकल लोक को नाशन ॥
 घर सम्पति सब दियो लुटाई । पुनि विचार कीन्ह्यो सुखछाई ॥
 मैं धनि हौं जेहि नाथ बोलाऊ । यह सबहै गुरुचरण प्रभाऊ ॥

दोहा—ताते प्रथमहि गुरु निकट, जाइ कमल पद वंदि ।

जस शासन गुरु देहिं गे, तस पुनि करव स्वच्छंदि ॥८५॥
 अस गुण रंगनगर गमनोसो । भाय्या रही तासु भवनोसो ॥
 कनक पात्र लै सकल बिहाई । मिली पंथ महँ कंथाहि जाई ॥

पति सों कही भीति तो नहीं । कनक कटोरा ममकर माहीं ॥
 कह कूरेश भीति तुव हाथा । याहि तजे नहिं भय मम साथा ॥
 तज्यो विपिन महँ कनक कटोरा । धर्म चारिणी तिय तेहि ठोरा ॥
 दम्पति रंगनगर कहँ आये । सुनि रामानुज अति सुख छाये ॥
 कांचीपूरण कांची जाई । वरदहिगे वृत्तांत सुनाई ॥
 इत रामानुज शिष्य पठायो । सादर कूरेशहि बोलवायो ॥
 बंधो सो गुरुपद तहँ जाई । गुरु उठाय लिय हृदय लगाई ॥
 दम्पति गुरु निवास किय वासा । कछुक काल सहुलास निरासा ॥
 विष समान सब विषय विहाई । बसै तहाँ सीला विनि खाई ॥
 एक समय वर्षा भे भारी । सीला बीनन गये सिधारी ॥

दोहा—पतिहि परत व्रत जानि तिय, सुनि बाजनको शोरा ॥
 भोग समय गुणि रंग को, मनमें कियो निहोर ॥८६॥

परत आजु लंघन पाति काहीं । हे प्रभु सुर विकरहु कस नाहीं ॥
 रंगनाथ तिय विनय विचारी । स्वप्न दियो अपने अधिकारी ॥
 छत्र चमर बाजन युत मेरो । भोग अनेक प्रकार घनेरो ॥
 चमर चलावत छत्र देखवत । देहु कूरेशहि बाज बजावत ॥
 पूजक सुनि सब भोग उठाई । चमर छत्र युत बाज बजाई ॥
 दियो निशा कूरेशहि आई । सो लखि चरित गयो चौआई ॥
 मैं नाहि मांग्यो प्रभु पहुँ जाई । कौन हेतु दिय भोग पठाई ॥
 तब तिय कह्यो कंत मैं मांग्यो । तुव लंघन लखि म्वहिं दुख लाग्यो ॥
 कृपानिधान रंगपति दीन्हो । दीनदयालु नाम सत कीन्हो ॥
 तब कूरेश तियहि अनखाई । कछु प्रसाद शिर धरि मुख नाई ॥
 कह्यो नारि कहँ मांग्यो तैंही । खाय तहीं न क्षुधा कछु मैही ॥
 तब तिय भोजन कियो प्रसादा । रह्यो गर्भ पायो अहलादा ॥

दोहा—व्यास पराशर अंश ते, जनमें युगल कुमार ।

भट्ट पराशर नाम द्वै, दिये यतीश उदार ॥ ८७ ॥

सुखमें बीति गयो कछु काला । एक समय यतिराज कृपाला ॥
गवन कियो कूरेश भवनमें । करि अभिलाषलखनशिशुमनमें
गोविंदाचार्यहि कह्यो बोलाई । लयायशिशुन मोहिं देहु देखाई ॥
जाय गोविंद शिशुन ले आयो । सुख द्वै मंत्र जपत सुख छायो ॥
तब बोले यतिपति जगबंधू । आवत इत द्वै मंत्र सुगंधू ॥
कह गोविंद मैं मंत्र रतन को । लायोंमैं इत जपत शिशुन को ॥
तब रामानुज कह्यो विचारी । करहु शिशुन कहैं शिष्य सुखारी
पांचहु संस्कार कर देहु । अस कहि पुनि प्रभुसहितसनेहु ॥
हरि आयुध मूखन लग कीन्ह्यो । आचारज पदबीतिनदीन्ह्यो ॥
गोविंद अनुज एक सुत जायो । नाम परांकुश पूर्ण धरायो ॥
यहि विधि यामुनार्य दुखतीना । सविधिसमनययतिनायककीना
बीत्यों सुख सों तहैं कछुकाला । भये अष्टहाइन दोउ वाला ॥

दोहा—पढ़न लगे गुरु पास दोउ, खेलन लगे बजार ॥

कोउ सर्वज्ञ महातमा, निकसे पंथ मझार ॥ ८८ ॥

गह्यो तासु कर करत ठिठाई । मूठी भरि बालुका उठाई ॥
पूछ्यो बालक तेहिं मतिधामा । जो सर्वज्ञ धर्यो तुम नामा ॥
तौ सिकता जो है मम मूठी । संख्या करहु तासु नहिं झूठी ॥
सिकताकन जो जानहु नाहीं । तौ सर्वज्ञ कहाउ वृथाहीं ॥
सुनि सर्वज्ञ चकित है गयऊ । केहिं बालक अस पूछत भयऊ ॥
सुनि कूरेश सुवन लहि मोदा । पहुँचायो घर तेहिं लै गोदा ॥
पुनि व्रतबंध भए दुहुँकरे । वेद पढ़नलागे गुरुनेरे ॥
एक समय कूरेश बजारा । खेलत देख्यो युगल कुमारा ॥
पकरि कह्यो पढ़ते कस नाहीं । शिशु कह पढ़ित सकलगलमाहीं ॥

पढ़ितहु अपढ़ित कंठहि भाषा । सुनि सुत पर सनेह पितु राखा
रंग सुवन कमलाकर पाली । किमि न होय सब विद्याशाली॥
भयो पराशर केर विवाहा । किय रामानुज परम उछाहा ॥

दोहा—रंगनाथ के मंदिरै, एक समय यतिराज ।

बोलत भे सुंदर वचन, श्रीवैष्णवी समाज ॥ ८९ ॥
दाशरथी विन म्बोहिं सुखनाहीं । ल्यावहुकोउ लेवाय मोहिं पाहीं
दाशरथी है मोर त्रिदंडा । सब शास्त्रन में बुद्धि उदंडा ॥
तब वैष्णवतुरंत तहँ जाई । ल्याये दाशरथीहि बोलाई ॥
तहँ रामायण को श्लोका । रामानुज बोले विनशंका ॥
श्लोक—वेदवेद्येपरेपुंसि जातेदशरथात्मजे ।

वेदःप्राचेतसादासीत्साक्षाद्रामायणात्मना ॥ १ ॥

रामायण हैं वेद स्वरूपा । तिमि द्राविड़ प्रबंध श्रुति रूपा॥
यह जानहु मत मोर प्रवीना । कहाहिं अन्यथा ते मतिहीना॥
उपदेशत अस शिष्य समाजू । सुखितरंगपुर बस यतिराजू ॥
रामानुज सत्संगहि पाई । भे सज्जन दुर्जन समुदाई ॥
निछुलापुर महँ अति बलवाना । धनुषदास इक मल्ल महाना ॥
कबहुँ रंगपुर उत्सव भयऊ । लै निज वाम मल्ल तहँ गयऊ॥
निज तियवदनविलोकतचलतो । गिरतपरतपथचलतपछिलतो
महामंद मति रमनी दासा । कबहुँ न ज्ञान विवेक प्रकासा॥

दोहा—रामानुज मज्जन हितै, कावेरी महँ जाइ ।

करि मज्जन लौटत भये, सहित शिष्य समुदाइ॥९०॥

छंद—किय दास सो धनुदास पथ महँ चलत स्वामीदेखि ॥

शिष्यन हँसत अस वचन भाष्यो नाहिंजड़ अतिलेखि ।

श्रीरंग दरश करायलेव बनाय यहि हरि दास ॥

अस भाषि शिष्य पठाय ताहि बोलायकै निज पास॥